

萬 有 文 庫

第 二 集 七 百 種

王 雲 五 主 編

宋 詩 鈔

(二)

呂 留 良 吳 之 振 吳 自 牧 選

李 宣 龔 校

商 務 印 書 館 發 行

宋 詩 鈔

(二)

呂留良吳之振吳自牧選

李宣龔校

國 學 基 本 叢 書

乖崖詩鈔

張詠字復之。濮州鄆城人。舉進士。知崇陽縣。歷官樞密直學士。知成都益州。禮部尚書。其治績多在蜀中。具載史傳。剛直自立。智識深遠。有澤被天下之心。尤博典籍。雖卜筮醫藥種植之書。無不精究。自少得劍術。無敵於兩河間。善奕碁。精射法。飲酒至數斗不亂。惡人諂事。不喜俗禮。因自號乖崖子。寫真自贊曰。乖則違衆。崖不利物。乖崖之名。聊以表德。嘗訪三峯陳希夷。搏搏顧謂弟子曰。此人於名利淡然無情。達則爲公卿。不達則爲帝王師。其爲高人推重如此。幼與青州傅霖同學。霖隱不仕。詠既貴。求霖者三十年不可得。晚自金陵造朝。論丁謂王欽若。出知陳州。一日霖忽來謁。關走白詠。詠訶曰。傅先生吾尙不得而友。汝敢呼姓名乎。霖笑曰。是豈知世間有傅霖者。詠問昔何隱。今何出。霖曰。子將出矣。來報子爾。詠曰。詠亦自知之。曰。知復何言。翼日辭去。後一月而詠卒。贈右僕射。諡忠定。詩雄健古淡。有氣骨。稱其爲人。其與傅山人詩云。寄語巢由莫相笑。此心不是愛輕肥。足以見其志也。

悼蜀四十韻

蜀國富且庶。風俗矜浮薄。奢僭極珠貝。狂佚務娛樂。虹橋吐飛泉。煙柳閉朱閣。燭影逐星沉。歌聲和月落。鬪雞破百萬。呼盧縱大噱。游女白玉璫。驕馬黃金絡。酒肆夜不扃。花市春漸作。禾稼暮雲連。紈繡淑氣錯。

熙熙三十年。光景倏如昨。天道本害盈。侈極禍必作。當時布政者。罔思救民瘼。不能宣淳化。移風復儉約。情性非方直。多爲聲色着。從欲竊虛譽。隨性縱貪攫。蠶食生靈肌。作威恣暴虐。佞罔天子聽。所利惟剝削。一方忿恨興。千里攘臂躍。火氣烘寒空。雪彩揮蓮鏢。無人能卻敵。何暇施擊柝。害物黷貨輩。皆爲白刃爍。瓦礫積臺榭。荆棘迷城郭。里第鎖苔蕪。庭軒喧鳥雀。斗粟金帛酬。束葛綺羅博。悲夫驕奢民。不能飽葵藿。朝廷命元戎。帥師盪兇惡。虎旅一以至。梟巢一何弱。燎毛焰晶熒。破竹鋒熠爚。兵驕不可戢。殺人如戲謔。悼耄皆麗誅。玉石何所度。未能剪強暴。爭先謀剽掠。良生計空餘。死心愁隕穫。四野搆豺狼。五畝孰耕鑿。出師不以律。餘孽何由卻。鄙夫識蜂蠆。寡術能籠絡。邊郵未肅清。何顏食天爵。世方尙奔馳。誰復振騫謬。黃屋遠萬里。九重高寥廓。時稱多英雄。才豈無衛霍。近聞命良臣。拭目觀奇略。

勸酒惜別

春日遲遲輾碧空。綠楊紅杏描春色。人生年少不再來。莫把青春枉拋擲。思之可不令人驚。中有萬恨千愁并。今日就花始暢飲。座中行客酸離情。我欲爲君舞長劍。劍歌苦悲人苦厭。我欲爲君彈瑤琴。淳風死去無回心。不如轉海爲飲花。爲幄。羸取青春片時樂。明朝匹馬嘶春風。洛陽花發胭脂紅。車馳馬走狂似沸。家家帳幙臨晴空。天子盛明君正少。勿恨功名苦不早。富貴有時偷閑強權笑。莫與離憂賈生老。

贈劉吉

天地有至私。劉生與英氣。學必摘其真。文能取諸數。叫回堯舜天。聒破周孔耳。通塞不我知。要在觀生意。居危不苟全。憑難立忠義。仕江南僞主。指斥姦佞。曰。果信是人。國將亡也。歸國有名賢。天子聞之喜。倒海塞橫流。掀天建高議。治黃河有功。議邊將不才。廷辨大臣阿諛。冒死雪忠臣。爲奸臣所陷。謹言警貴侍。重指中貴弄權。四海多壯夫。望風毛骨起。如今竟陵城。推司茶菽利。鶴情終是孤。仁性困亦至。勞勞憂衆民。咄咄罵貪吏。方期與叫關。此實不可棄。如何不自持。稍負織人累。酣歌引酒徒。亂入垂楊市。狂來拔劍舞。踏破青苔地。羣口咤若奇。我心憂爾碎。請料高陽徒。何如東山器。請料酒仙人。何如留侯志。去矣留跋江。深心自爲計。

寄晁同年

昔同白日昇穹碧。還同水國司民籍。三年不見頻寄書。兩月相過忘行役。桃花江上雪霏霏。黃鶴樓中風力微。幽勝逼人魂欲飛。此時不醉無與歸。人間美事應有主。別馬蹄露邊塞土。南樓一望心淒迷。昨夜疎簷滴寒雨。休誇筆力敵真風。勿憶雲山千萬重。但遇西風一行雁。殺青相問莫辭慵。

與進士宋嚴話別

人之相知須知心。心通道氣情轉深。凌山跨陸不道遠。躡屣佩劍來相尋。感君見我開口笑。把臂要我談王道。幾度微言似慚心。投杯着地推案叫。此事置之無復言。且須舉樂催金船。人生通塞未可保。莫將閑事縈心田。興盡忽告去。挑燈夜如何。彈琴起雙舞。拍手聊長歌。我輩本無流俗態。不教離恨上眉多。

縣齋秋夕

才薄難勝任。空鎖懶惰情。公堂羣吏散。苔地亂蛩聲。隔歲鄉書絕。新寒酒病生。方今聖明代。不敢話辭榮。

登黃鶴樓

重重軒檻與雲平。一度登臨萬想生。黃鶴信移煙樹老。碧雲魂亂晚風清。何年紫陌紅塵息。終日空江白浪聲。莫道安邦是高致。此身終約到蓬瀛。

登麟州城樓

莫問戎庭苦。高欄是夕攀。時清官事少。邊靜戍人閑。雉堞臨寒水。穹廡倚亂山。皇恩正無外。不擬更移還。

再任蜀川感懷

官職過身髻已衰。傍人應訝退休遲。從來蜀地稱難制。此是君恩豈合違。兵火因由難卽問。郡城牢落不勝悲。無煩苦意思諸葛。只可頌條使衆知。李順劉幹王均。十年三亂蜀。人人思得諸葛亮。遇離亂。天子仁聖。國富兵強。只宜取遠寬平。提一旅之兵。平定川陝。此非宏才異略。則不濟也。方今詔。禁暴刑殺之令。不半年自整爾。

每憶家園樂蜀中寄傅逸人

每憶家園樂。名賢共里閭。劇談祛夜瘧。開寶中與傅會於韓城。終夕幽夢驗鄉書。每發家書。漸老性情。嬾隔年音信疎。終嫌累高節。不得薦相如。淳化末。余直省。密使人誘傅。意勉之。仕進。

送趙侍丞罷秩游青城山

公餘長閉目。只是老心情。聞道尋山去。連忙出戶迎。好峯須到頂。靈迹要知名。迴日從容說。余將少解醒。

金陵郡齋述懷

傍人往往羨清途。野逸情懷亦自扶。官舍四邊多種竹。潮溝一面近生蘆。病嫌見客低徊甚。老覺臨官氣味粗。不信浮名是身累。有時閒撚白髭鬚。

郡齋書情寄仙游張及

老去慵仍甚。榮名舊日疎。又因經歲病。不答故人書。閉閣僧歸後。看山吏散初。何因論心跡。之子最相于。

遊趙氏西園

蜀中春豔世間疎。比並陳園恐未如。數里花光浮暖日。六街塵淨見香車。翻空雅樂催歡處。入格新詩上板初。方信承平無一事。淮陽閒殺老尙書。

寄田錫舍人

當年心計此心知。忽忽逢人亦自疑。枉是憂公生白髮。有何長路謝清時。林僧已怪抽身晚。朝侶猶嫌到闕遲。多喜通規識幽抱。路遙無處寄相思。

寄郝太沖

閑愁休問意休疑。此事關身合再思。心靜易求長世法。氣狂難與少年時。新編到底將何用。舊好如今更有誰。猶憶公堂秋會否。透窗寒竹夜風吹。

送別蘇寺丞

公身多不定。何路慰飄離。莫以微言合。苦將幽思悲。山程朝醉少。雪屋夜眠遲。卽問逢春約。芳菲折贈誰。

送馬道人歸天台

逢山長欲便辭榮。見說天台益自驚。絕頂要歸終久住。此時無計伴師行。囊攜鼎藥身難老。路接仙橋眼更明。莫笑官途滋味薄。五湖曾有片帆輕。

歸越東舊隱留別秦中知己

客亭楊柳葉初殘。歌咽秋空慘別顏。吟愛好峯歸越路。醉衝寒雨出秦關。煙蘿庭戶重棲倚。漁浦人家舊往還。縱使功名無分得。免教心在怨尤間。

郊居會傅逸人

久客倦驚魂。田居乞暫安。義寧忘力學。貧要奉親歡。枕外河聲老。門前野色寬。支流狂繞砌。叢葦品當欄。書葉招鄰彥。扶筇話肺肝。吟懷難契遇。醉語動辛酸。隱几歲時變。凭軒雷雨殘。致君須有分。會此擲魚竿。

再會傅逸人

分到知心死不輕。幾年曾是愴離情。微風吹雨雁初下。落葉滿階蟲正鳴。燈靜苦嫌論劍略。簾涼頻喜轉琴聲。從來共約雲泉老。肯向人間占好名。

貽傅逸人

少年名節動人羣。避俗身居積水濱。幾爲典衣留遠客。半來欹枕看閑雲。門連酒舍青苔滑。路近沙汀白鳥分。誰道無情活黎庶。數篇新製詠南薰。

郊居寄朝中知己

年來流水壞平田。客徑窮愁自可憐。汀葦亂搖寒夜雨。沙鷗閑弄夕陽天。狂嫌濁酒難成醉。冷笑清詩不直錢。碧落故人知我否。幾回相憶上漁船。

懷張白逸人

昔年吟社偶通鄰。常貴高風入格真。名好已期天共歇。性孤翻與世無親。梁園醉別花燒眼。楚寺秋歸鶴伴身。從此幽懷不能說。五湖煙月二京塵。

訪人不遇

舊徑莓苔合。兒童獸閉門。踏霜歸遠店。涼月照空樽。雁響蒹葭浦。風驚橘柚村。知音在何處。凝寂欲銷魂。

舟次辰陽

昔賢勞苦爲憂官。我自無才欲忘餐。鳴棹幾程灘勢惡。宿亭一夜雨聲寒。村連古洞蠻煙合。地落秋畝楚俗權。雖指公餘便東下。好峯猶得捲簾看。

舟中晚望桃源山

仙山初指眼初明。倚棹因妨半日程。雲裏未忘尋去路。世間爭合有浮名。崑空關老松千尺。天靜時聞鶴一聲。更謝暮霞憐惜別。滿坡紅影照崢嶸。

幽居

落花時節掩關初。清絕江城舊酒徒。滿屋煙霞春睡足。一谿風雨夜燈孤。易中有象閑消息。身外無求免歎吁。多謝嵩僧頻見訪。欲迴流水又踟蹰。

旅中感懷

人世貪名豈是閑。幾回思算幾淒然。故鄉路遠不得信。寒月夜來還復圓。霜趁悲鴻歸楚澤。風移殘燒下秦川。莫言酒作銷憂物。更有新詩一兩篇。

新市驛別郭同年

驛亭門外鼓分攜。酒盡揚鞭淚溼衣。莫訝臨歧再回首。江山重疊故人稀。

晚泊長臺驛

驛亭斜掩楚城東。滿引濃醪勸諫慵。自戀明時休未得。好山非是不相容。
過華山懷白雲陳先生

性愚不肯林泉住。強要清流擬致君。今日星馳劍南去。回頭慚愧華山雲。

途中

人情到底重官榮。見我東歸夾路迎。不免舊谿高士笑。天真喪盡得浮名。

桃源觀

簷下山光砌下苔。人間重遇眼重開。舊林諸子休移誚。已許孤雲作計迴。

雨夜

四簷風雨滴秋聲。醉起重挑背壁燈。世事不窮身不定。令人閒憶虎溪僧。
簾幕蕭蕭竹院深。客懷孤寂伴燈吟。無端一夜空階雨。滴破思鄉萬里心。

寄傅逸人

當年失腳下漁磯。苦爲明朝未得歸。寄語巢由莫相笑。此心不是愛輕肥。

闕下寄傅逸人

疎疎蘆葦映門牆。更有新秋膾味長。何事輕拋來帝里。至今魂夢遶寒塘。

送別王祕丞

帝鄉三十年前別。江外相逢髩已衰。清論未窮行計速。爲君臨水立多時。

送別李司直

亭下依微見遠村。亭中離恨若爲論。數聲歌罷揚帆去。民吏相看有淚痕。

送魏道士

江上蕭蕭木葉飛。天台狂客杖藜歸。莫嫌俗吏勤相顧。曾是嵩陽舊掩扉。

答劉道人

嵩陽峯底洞中天。曾共浮丘對掩關。知道高閑少兼濟。折腰從此到人間。

謝雲居山人草鞋

雲居山客草爲鞋。路轉千峯此寄來。昨日公餘偷步躡。萬端心緒憶天台。

聞鷓鴣

畫中曾見曲中聞。不是傷情卽斷魂。北客南來心未穩。數聲相應在前村。

清獻詩鈔

趙抃字閱道。衢之西安人。中景祐元年進士乙科。通判宜州。以母喪廬墓三年。孫處爲作孝子傳。召爲殿中侍御史。京師號鐵面御史。進參知政事。已而求郡。旋召旋罷。英宗朝除龍圖閣直學士。知成都。蜀益治。神宗初。召知諫院。曰。聞卿匹馬入蜀。以一琴一龜自隨。爲政簡易。亦稱是耶。旣與王安石議政。不協。求去。除資政殿學士。出外改越州。致仕。尋卒。贈太子少師。諡清獻。詩觸口而成。工拙隨意。而清蒼鬱律之氣出於肺肝。然其學多本於佛。與濂溪爲僚。而不知改。故亦不能卓然有所發揮也。

題周敦頤濂溪書堂

吾聞上下泉。終與江海會。高哉廬阜間。出處濂溪派。清深遠城市。潔淨去塵壒。毫髮難遁形。鬼神縮妖怪。對臨開軒窓。勝絕甚圖繪。固無風波虞。但覺耳目快。琴樽日左右。一堂不爲泰。經史日枕藉。一室不爲隘。有尊足以羹。有魚足以膾。飲啜其樂真。靜正於俗邁。主人心淵然。澄徹一內外。本源孕清德。游詠吐嘉話。何當結良朋。講習取諸兌。

次韻江鉞都官涼軒

執己剛玉性。誰得同趣向。涕唾無所藉。歸居宅深曠。左右山林間。巒岼立屏障。坐期清風來。未許酷日晃。

高棚立西軒。密葉覆其上。益爲晚宇廕。詎隔霞空望。聖書樂名教。俗事絕塵鞅。恬然寵辱驚。足矣庭闈養。下榻遲佳朋。盈樽倒新釀。藥劑於有靈。神明助無恙。賢豪重出處。詞句大奔放。謂愚可與道。緘遺俾酬倡。忽如窮窘人。獲發金玉藏。收儲篋笥光。孰顧貪怵諂。

留題劍門東園

劍州古要害。重門搃開闔。隄防兩川地。喉吭此呀呷。在昔禦狂寇。如朽施巨拉。時平付良守。一與公論合。政成治東圃。於焉解賓榻。予方錦官去。邀我置壺榼。縱步車馬休。舉目蒼翠匝。攄懷談笑喧。傾車潺湲雜。不春亦芳菲。匪風自蕭颯。主賓飲興豪。量海川酒納。貳車臺中舊。題詩謂予盍。默默極佳趣。茲俗何以答。

雙竹

余家有故園。園中可圖錄。天然一派根。一根生兩竹。一長復一短。比之如手足。長者似乃兄。短者弟相逐。我見人弟兄。少有相和睦。竹分長幼情。人豈無尊宿。將竹比人心。人殆類禽畜。常記五六歲。不見還啼哭。及至長大時。妻孥相親族。咫尺不相見。相疎何太速。不顧父母生。同胞又同腹。旦夕慕歌歡。幾能思骨肉。枉安人鬚眉。而食天五穀。靜思若斯人。爭及園中竹。

寄酬蔡州王陶正言

自顧愚無堪。老大有所用。得郡江湖來。一意雲泉縱。驚此西南身。連夕東北夢。乃知故人念。許與明月共。

荆書一紙賢。季諾千金重。寄我瓊瑤篇。使得長諷誦。寒松有唳鶴。高梧有鳴鳳。何日謝知音。爲鼓商絃弄。
贈陽安除邁表兄屯田

少時所學苦。食蘗日自強。壯歲從宦清。飲冰中剛腸。陽安百里地。邈在天一方。惠政不鞭朴。期民樂耕桑。念予昨守轡。與兄會家鄉。兄今歲已滿。余遽提蜀疆。一朝此邂逅。五載忘參商。且勿語離索。易老驚鬢霜。且勿較通塞。放懷把酒觴。上方聖政新。求賢坐明堂。兄道足施設。兄志彌頡頏。喜予外祖門。從此生輝光。

送周穎之京師

吾鄉伯堅真丈夫。氣剛色強言詞疎。胸中一物不使有。日儲月斂唯詩書。布裘落魄韋帶緩。權門不肯低眉趨。朋游累百誰爾汝。人皆不與爭擲揄。掩關啜菽苦意氣。糞壤玉璧泥沙珠。宣慈中山我孤處。昨日走介遺吾書。書云詔下籲俊父。父兄命穎之京都。古人求養志擇祿。今而豈得逃馳驅。肩書手劍出門去。嚙咨肯復兒女如。我聞此語涕交下。人皆欲養繫我無。羨子之爲與道合。勸子亟往無踟蹰。明年得志拜堂上。豈非人子榮親歟。

順風呈范御史

濠州抵泗里數百。長淮波平曉如席。鳴驛解絳楊柳堤。畫船中有東吳客。君恩得請許歸去。聊治里閭去咫尺。歲窮天遠心欲飛。念之汲汲事行役。豁如天意適我願。號令西北起風伯。初時淅淅以鼓動。布帆尙

留十幅窄孤檣得勢安以平。中流激箭巨浪擊。棹橫櫓閣力不用。疾若鷲隼增羽翮。瞥然兩眼瞬雲過。木葉馳黃山走碧。拏舟月餘今自快。一樽自歌兩手拍。樽中酒空不自歌。順風好景如之何。毗陵太守同此樂。爲言無惜新詩多。

溪山晚目

幽花連徑發。驚鳥避人啼。雨過晴虹上。風清走馬嘶。灘平魚艇穩。村小酒旗低。誰及山翁樂。號呶醉似泥。

村居

午寢忘譏刺。閑居杜送迎。雨泥雙燕下。烟壠一犁耕。座入山光迥。門連野色平。吟餘仍兀坐。誰與戰楸枰。

曲館

日華烘玉甃。烟縷亘雕甍。棗熟房櫳暝。花妍院落明。醉輕春有味。夢短晝無情。欲識悒悒意。回文織已成。

題九仙寺

墜果春三徑。蒸雲晚一軒。廊腰迴戰蟻。山腹合啼猿。泉淡禽窺影。苔深屐印痕。自慚名利者。聊免世紛喧。

贈吉安院主

學佛之徒衆。難能是向文。唯師獨奇尙。於我故殷勤。詩遇知音誦。琴防俗子聞。虛亭對明月。長許到宵分。

和何節判觀水

澄江抵練長。極目路滄茫。烟芷差差綠。風荷柄柄香。西流終古恨。南浦鎮時忙。擬待傳辭意。離人在楚鄉。

歲暮感懷

早是窮冬逼。那堪客思兼。事嗟流水遠。年愧入春添。與雪幸同操。驚霜忽到髯。晚舟前浦泊。何處有青帘。

寄任大中秀才

今我歲將暮。過橈鸚鵡洲。憶君人少與。買舍浹江頭。客路書多絕。吾鄉夢半遊。明年誰到蜀。能寄好書不。

向晚

向晚立汀沙。人閑目更賒。林疎僧屋露。風轉客帆斜。幽白孤飛鳥。橫紅數抹霞。漁翁偶相問。憐我宦天涯。

和戴天使重陽前一夕宿長沙驛

楚館夜衾涼。離人念故鄉。遠吟只覺苦。歸夢不成長。壁有寒蛩怨。鄰聞綠蟻香。登高在何處。明日宴山陽。

春日陪燕會春園亭

爲怕三春過。因謀數刻狂。醉輕欣射中。歡甚惜歌長。躡馬花間繫。啼鶯柳下藏。前旌歸去晚。十里淡風光。

和范御史初出都門

牘奏辭三院。鄉榮領百城。帝恩山嶽重。臣命羽毛輕。風月隨人好。江湖照膽清。須公贈金玉。光照重行行。

和韻前人初出鑾頭

奏懇初無飾。天恩亦重違。一麾新命下。兩槩故關歸。淮木林林脫。霜鴻陣陣飛。賢朋詩酒樂。行矣自相依。

驚濤

路半狂飈起。江心巨浪橫。蒼忙舟子叫。匍匐稚兒驚。古岸移時入。新醪薄暮傾。此宜無足道。大抵似人生。

題張果老洞

洞老壽松椿。高名古絕羣。亂山泉瀲灩。舉世事紛紛。使者持丹詔。先生臥白雲。方今莫招隱。君德正華勛。

次韻孔憲山齋

訟簡歲豐盈。鈴齋竟日清。窗排羣石怪。簷擁遠山明。古木風千葉。新髭雪數莖。開樽向幽處。餘論見文情。

送范憲百祿赴闕

泥書下紫宸。公議協朝紳。真主正圖治。諫官今得人。從容陪國論。憔悴恤天民。大對如晁董。公嘗素所陳。

題靈山寺

我爲靈山好。登留到日曛。巖幽餘暑雪。鐘冷入秋雲。篇詠唯僧助。塵煩與俗分。明朝入東棹。因得識吾文。

送章帖少卿提舉洞霄宮

祕館紅塵外。瑤京白日邊。樽中不空酒。琴面已無絃。曉上朝真閣。春耕負郭田。優游大自在。何處更神仙。

遊青城山

三十六峯峻。維岷在蜀奇。方行刺史部。重款丈人祠。凍雪諸蕃隔。晴雲六面披。訪山窮寶洞。山有寶仙第。五洞。昔投龍之所。勅鬼覘豐碑。泉落寒崖響。蘿依古木垂。良工存舊筆。青城觀壁。悉孫知微名畫。老叟琢新詩。岷山集。示陟險齊雙屐。逢幽鼓七絲。盤桓不忍去。還作更來期。

書院

兩久藏書蠹。風高老屋斜。鄰居盡金碧。一一梵王家。

和范御史石倉晚泊

天迥旅懷闊。風長野叫來。日暮江上。輒數十人。連續長歌。人謂之野叫。滄波清可愛。先爲濯京埃。

憶信安五弟附

鴈殘鸚鵡洲邊過。憶汝東吳住舊廬。誦聖窮愁千卷外。覓官留滯十年餘。也知失意能平氣。底事多時不寄書。兄在松溪我荆楚。別懷三處一欷歔。

除夜泊臨江縣言懷

縣封蕭索楚江澄。旅況吟懷冷似冰。漏促已交新歲鼓。酒闌猶剪隔宵燈。立身從道思無愧。得路由機患不能。未報君恩踰四十。青春還是一番增。

寄里中親友

記得城南數刻權。破權爲別淚闌干。間關遠道初沿牒。寂寞長亭一據鞍。郊外此時涼葉亂。嶺頭平日臆梅殘。不辭頻寄南州信。草檄無功楯葉乾。

和人清明有感

湖外清明物態繁。曉林鶯舌鬪關關。枉緣春意無時盡。自是人心不暫閑。舊隱東君曾藉草。新官南郡亦登山。滿頭花卉盈樽酒。且向東風一破顏。

勸學示江原諸生

古人名教自詩書。淺俗頽風好力扶。口誦聖賢皆進士。身爲仁義始真儒。任從客笑原思病。莫管時譏孟子迂。通要設施窮要樂。不須隨世問榮枯。

初入峽

峽江初過三遊洞。天氣新調二月風。樵戶人家隨處見。仙源雲路有時通。峯巒壓岸東西碧。桃李臨波上下紅。險磧惡灘各幾許。晚停征棹問漁翁。

過嶺回寄張景通先生示邑下同入

二年官役愧能名。賢得斯人幸合并。幾度孝廉交郡辟。一生文行出鄉評。君廬阜水江頭遠。我馬青泥嶺頂行。西首胡爲書以贈。欲持同邑寄諸生。

同萬州相里殿丞游溪西山寺

使君呼客入山行。曉徑前驅照彩旌。蠻女背樵巖側避。野僧攜刺馬頭迎。千層雲水迷三峽。一闋人煙認百城。樓閣憑餘清我聽。竹風蕭瑟澗泉鳴。

謁青城山

背琴肩酒上青城。雲爲開收月爲明。觀宿有詩招主簿。劉絳詩約同遊。廬空無分遇先生。張俞出山。墻留古畫仙

姿活。石載奇文俗眼驚。卻念吾鄉山亦好。十年孤負爛柯行。

寄永倅周敦頤虞部

君去濂溪湖外行。倅藩仍喜便鄉程。九疑南向參空碧。二水秋臨徹底清。詩筆不閑真吏隱。訟庭無事洽民情。霜鴻已到衡陽轉。遠緒憑誰數寄聲。

招運判霍交回轅

自卽之雅漸高丘。所過從容盡勝遊。白鶴山頭雲裏寺。金鷄關外雨中州。公今南按蠲民瘼。歲已西成輟上憂。江濱荷花開似錦。且同歸去採蓮舟。

次韻王憲中秋不見月

一城歌管中秋樂。薄暮樓臺六幕垂。明月幸無虧損處。浮雲應有斂收時。聊因表海今宵醉。卻起錢塘去

歲思有美堂前如白晝。練鋪江面鏡鬚眉。

次韻孔憲蓬萊閣

山巔危構傍蓬萊。水閣風長此快哉。天地涵容百川入。晨昏浮動兩潮來。遙思坐上遊觀遠。愈覺胸中度量開。憶我去年曾望海。杭州東向亦樓臺。杭有望海樓。

再登亭偶作

氣象三齊古得名。時登表海最高亭。河源一水下青嶂。人物兩城如畫屏。邑報有秋期俗阜。守慚無術濟民靈。從來獄市并容地。且向樽前任醉醒。

再有蜀命別王居卿

穆陵關望劍門關。岱嶽山連蜀道山。自顧松筠根節老。誰令霜雪髻毛斑。離家敢謂虞私計。過闕尤欣覲帝顏。叱馭重行君莫訝。古人辭易不辭難。

寄題劉詔寺丞濫泉亭

泉名從古冠齊丘。獨占溪心湧不休。深似蜀都分海眼。勢如吳分起潮頭。連宵鼓浪搖明月。當暑迎風作素秋。亭上主人留我語。只將塵事指浮漚。

過鐵山鋪寄交代吳龍圖

暫留山驛又晨興。西望旌麾想舊朋。三院筆簪曾對直。兩川兵印復交承。年光頭髻華如雪。世態心情冷似冰。境上憑詩馳遠意。青泥寒曉入雲燈。

過左縣偶成

東南再守二年間。青·白·杭·徒徒蜀何須問險艱。入覲已違龍尾道。出麾還過鹿頭關。與民共約三春樂。願我都忘兩鬢斑。歲滿乞骸何處好。仙棋一局爛柯山。

鈴兵王閣使素芳亭賞梅花

素萼清香並酒卮。主人勤意囑留詩。爲逢蜀國新開日。卻憶江南舊賞時。春密未通桃李信。臘殘都放雪霜姿。先公舊植亭欄外。肯構重來見本枝。先司空鈴兵日始創是亭。閣使復繼其職。是謂有子矣。

次韻李元方卽事

壯歲胸懷獨感時。肯隨寒暑似民咨。能思損益開長卷。任有閑忙不負詩。趣句已爲迂俗笑。聲名須共古人期。茅齋寂坐生秋思。無語西風夜月知。

聞嶺外寇梗

驚說炎飄煙瘴時。洞蠻蠡起寇南陲。家書萬倍金難得。遠夢千迴路不知。刺史沒身專捍禦。康州趙潛敵。諫官啣命救瘡痍。起居趙叔武出使。伏波死去今誰繼。大筆銘勳壓海涯。

次韻程給事寓越廨宇有懷

越郡江南盡不如。樂天流語信非疎。人從鎖闥中間出。宅在蓬萊向上居。言念玉符分鎮日。卻思瓊苑拜恩初。臨風又辱詩筒寄。足見優游刃有餘。

次韻邵齋偶成

兩火一刀名素勝。十分雙澗地長靈。賞心曾爲乘華舫。好手應難作畫屏。北海樓前千里靜。南山天末四時青。蓬萊自是仙家景。解使詩翁醉眼醒。

武林卽事寄程給事

乞得錢塘下九天。徙從青社復三川。坤維十往萬餘里。吳分重來七八年。鑑水坐遙懷舊治。柯峯歸晚愧前賢。東州賴有微之約。曾寄詩筒遞百篇。七十隨緣豈有由。樂天曾不厭杭州。青山未隱如千里。白首重來又九秋。月窟仙人遺桂子。海門神物助潮頭。自慚老守無心力。坐鎮吾民靜卽休。

有懷程給事

稽嶺樓臺眞曠絕。武林風物競豪華。兩州對望音題數。一水中分會晤差。言到越東海渺茫排島嶼。西陵依約露人家。元和賡唱今猶古。此樂情懷豈有涯。

次韻歲暮有感

歲月如流不用嗟。盛衰前定豈曾差。自憐覽照頭渾雪。猶喜觀書目未花。竺嶺兩曾逢落桂。龍山三見擲新茶。春元便欲休官去。誰顧杭州十萬家。

次韻卽事見懷

鑑水寬閑稱越國。河塘繁劇是杭州。蓬山君繼元丞相。竹馬予慚郭細侯。郡邑豐穰真可喜。人家飽煖更何憂。西陵隔岸無多遠。數上臨江百尺樓。

清風閣卽事

庭有松蘿砌有苔。退公聊此遠塵埃。潮音隱隱海門至。泉勢潺潺石縫來。夜榻衾裯仙夢覺。曉窗燈火佛書開。休官不久輕舟去。喜過嚴陵舊釣臺。

有懷蔣堂侍郎

卻憶東舟去若仙。津亭分袂忽經年。春風境上無多地。夜月湖中共一天。海閣坐觀濤擁鷺。山堂吟聽漏移蓮。新詩往復交情見。巨集成來已百篇。

寄酬前人上巳日鑑湖卽事二首

湖上初經上巳春。水邊遙見碧蕪新。輕舟競泛無涯樂。夾岸希逢不醉人。廚醞旋葛浮蟻醖。府茶深點臥

龍珍詩筒往復余知幸。垂老親仁得善鄰。
蓬萊高與臥龍俱。位望兼崇似合符。絃管夜聲傳井邑。樓臺春影蘸江湖。休功卽報暮年政。直節曾行萬里途。真是玉皇香案吏。坐看歸去贊蘿圖。

次韻前人蓬萊閣卽事

蓬萊窗外曉光分。夢覺初驚杜宇魂。但有吏供衙府曙。斷無人到訟庭喧。濛濛宿霧開湖面。隱隱更潮過海門。一水兩州皆重鎮。越清杭劇不同論。

上天竺寺石巖花

對植齊開古梵宮。欲求精筆畫難工。直將春占三旬盛。誰謂花無十日紅。未羨山桃資客笑。且陪庭栢作家風。遍尋他處都無此。寶殿前頭只兩叢。

陪趙少師遊西湖兼簡坐客

絲管喧喧擁畫船。澄瀾上下照紅蓮。一樽各盡十分酒。四老共成三百年。北闕音書休憶念。西湖風物且留連。杭民夾道焚香看。白髮朱顏長壽仙。

次韻程給事見寄

羨公鈴閣絕纖塵。顧我何嘗德被人。訟牘自憐無日暇。詩筒翻喜入秋新。白頭未許還官政。紫詔頻煩慰

老臣一去蓬萊已踰歲。夢魂長到十洲春。

次韻許遵少卿見寄

頭上有霜添白髮。囊中無藥駐朱顏。堪驚積歲加衰老。未省何時得退閑。淵淨思臨浮石渚。喧譁羞對武林山。君恩早賜俞音下。卽擁菟裘故里還。

次謝許少卿寄臥龍山茶

越芽遠寄入都時。酬唱珍誇互見詩。紫玉叢中觀雨脚。翠峯頂上摘雲旗。啜多思爽都忘寐。吟苦更長了不知。想到明年公進用。臥龍春色自遲遲。

次韻程給事郡齋秋暑

老爲鄉郡止偷安。自愧仙蹤未易攀。八面松陰籠古寺。三秋桂子下靈山。良朋寄意詩篇裏。高會追歡夢寐間。卻憶會稽清曠處。樵風朝暮若邪灣。

次前人遊鑑湖

湖治誰能繼後塵。馬侯祠閣至今存。昔太守馬臻開鑑湖。窮源上達仙翁井。引派傍通吏部園。紅旆遍遊償素志。畫橈歸去近黃昏。別懷屈指期將半。況屬鄉州役夢魂。

累乞致政詔答未允述懷

自愧孤忠荷聖慈。恩榮肯向九天辭。於今蒲柳衰殘日。好是雲煙放曠時。玉闕累章煩賜詔。滌江兩槩蹉歸期。宵征自有高人笑。漏盡鐘鳴曉未知。

贈別周元忠秀才

吾里推高節。行孤諸生師。帳是規摹窮。經不治五畝宅。教子已爲千里駒。暫出林泉飛兩槩。且陪風月賞西湖。了知富貴儻來物。誰向浮雲間有無。

平溪堂

亭號休休古退藏。豈如溪上構虛堂。坐邀城市真瀟灑。卻謂江湖太渺茫。下筆新題無俗事。搗笳野服是家常。臨流最有清風快。未見故人心已涼。

遊雁蕩將抵温州寄太守石牧之

霜風雙鬢雪鬢鬢。物外尋真頓離凡。子舍若非叨別乘。我車安得到靈巖。碧窺秋瀑心同洗。紅嚼山杷口似饑。多謝賢侯見招意。數貽嘉詠與珍函。

次毛維瞻溪庵

退訪雲山遠世塵。結庵臺上古溪濱。圍碁每放爭先手。隱几能安自在身。鷗鷺後前如舊物。龜魚遊泳不疑人。曲肱飲水真賢樂。何用淵明漉酒巾。

送穆舜賓承議致政還鄉

清脩平日得無慚。學道勤行肯妄談。軒冕誼譁公始悟。林泉瀟灑我先諳。曾憐避弋雲中雁。每念纏絲鬢裏蠶。畫舫西歸時節好。春山如黛水如藍。

和沈太博小圃偶作二首

名園雨後百花繁。人倚危樓十二干。園裏芳菲樓上客。一般情緒怕春寒。日烘薄霧開柔陌。風冒遊絲着柳條。語燕啼鶯自撩亂。驚人殘夢是春朝。

過青泥嶺

老杜休誇蜀道難。我聞天險不同山。青泥嶺上青雲路。二十年來七往還。

和宿峽石寺下

淮岸浮圖半倚天。山僧應已離塵緣。松關暮鎖無人跡。惟放鐘聲入畫船。

賞春亭

滂葩浩豔滿亭隈。當席芳樽醉看來。始信春恩不私物。亂山窮處亦花開。

玉泉亭

潺潺朝暮入神清。落澗通池遶郡廳。亂石長松山十里。討源須上玉泉亭。

和范都官行後九日奉寄

湖平風穩送歸航。望隔嚴灘七里長。更上高峯儘高處。黃花新酒醉重陽。

次韻范師道龍圖

舍車弭蓋爭尋勝。坐石攜泉旋煮茶。可惜湖山天下好。十分風景屬僧家。

答贛縣錢顛著作移花

令尹憐花意思勤。海棠多種郡園新。自從兩蜀年年見。今日欄邊似故人。

次韻郁李花

花縣逢春對曉暉。朱朱白白綴繁枝。梅前菊後何須較。好似人生各有時。

辛巳青州翫月有懷

中秋去歲中和宴。中和·杭州堂名。表海今朝北海壘。表海·青州亭名。天上無私是明月。隔淮千里照人來。

題郡園亭館

爲愛東園四照亭。剪開繁木快人情。新秋雨過閑雲卷。十里南山兩眼明。

題御愛山

岷峨西列華排東。餘縱崢嶸敢競雄。不是當時經御愛。此山還與衆山同。

出鴈蕩回望常雲峯

遊遍名山未肯休。征車已發尙回眸。高峯亦似多情思。百里依然一探頭。

客舟夜雨

朝發溫江上處溪。小舟無寐枕頻欹。夜來雨作蓬蔭響。恰似當年赴舉時。

宛陵詩鈔

梅堯臣字聖俞。人稱宛陵先生。宣州宣城人。以從父蔭補太廟齋郎。歷主簿縣令。監稅湖州。簽署忠武鎮安兩軍節度判官。初。大臣屢薦。宜在館閣。嘗一召試。賜進士出身。餘輒不報。嘉祐初。學士趙槩等十餘人。列言于朝。乃得國子監直講。累官至尚書屯田都官員外郎。撰唐載二十六卷。多補正。乃命編修唐書。書成未奏而卒。聖俞少即以能詩名天下。求者踵至。其初喜爲清麗。閑肆平淡。久則涵演深遠。間亦琢剝。以出怪巧。然氣完力餘。益老以勁。其應於人者多。故辭非一體。非如唐諸子號詩人者。僻固而狹陋也。在河南時。王晦叔見而歎曰。二百年無此作矣。賢士大夫如溫公。東坡。介甫諸人。咸敬重之。尤與歐陽文忠公善。世比之韓孟兩公。亦頗以自況。故貢奎詩云。詩還二百年來作。身死三千里外官。知己若論歐永叔。退之猶自愧郊寒。蓋言詩力也。又龔嘯云。去浮靡之習。于崑體極弊之際。存古淡之道。于諸大家未起之先。此所以爲梅都官詩也。果信。

河陽秋夕夢與永叔遊嵩。避雨於峻極院。賦詩。及覺。猶能憶記。俄而僕夫自洛來云。永叔諸君陪希深祠岳。因足成短韻。

夕寢北窗下。青山夢與尋。相歡不異昔。勝事卻疑今。風雨幽林靜。雲烟古寺深。此二句夢中得攢衣方有感。還喜

問來音。

希深惠書言與師魯子聰永叔幾道遊嵩因誦而韻之

聞君奉宸詔。瑞祝疑靈岫。山水聊得游。志願庶可就。豈無朋從俱。況此一二秀。方靳建春陌。十刻殘晝漏。初經緱氏嶺。古柏尙鬱茂。卻過轘轅關。巨石相撐鬪。夕齋禮神祠。法袞被藻繡。畢事登山椒。常服更短後。從者十數人。輕齋不爲陋。是時天清陰。力氣勇奔驟。雲巖杳虧蔽。花草藏澗竇。傍林有珍禽。驚聒若避殼。盤石暫憩休。泓泉助吞漱。上窺玉女窗。嶄絕非可構。下玩搗衣砧。焜耀金紋透。尹子體雄恢。攀緣逾習狃。歐陽稱壯齡。疲軟屢顛踣。競歡相扶持。芒屨資踐蹂。八仙存故壇。三醉孰云謬。鄙哉封祝碑。數子昔鑿鏤。偶誌一時事。曷虞來者詬。絕頂瞰諸峯。隘然輕宇宙。遙思謝塵煩。欲知羣鳥獸。韓公傳石室。聞之固已舊。當時興稍衰。不暇苦尋究。東崖暗壑中。釋子持經呪。于今二十年。飲食同猿狖。君子聆法音。充爾溢膚腠。嘗期躡屐過。吾儕色先愀。韻叶遂乖真諦言。茲亦甘自咎。中預會幾望。涼蟾皓如晝。紛紛坐談譚。草草具觴豆。清露濕巾裳。誰人苦羸瘦。便卽忘形骸。胡爲戀纓綬。或疑桂宮近。斯語豈狂瞽。歸來遊少室。嶠岬殊引脰。石室迢遞過。探訪仍邂逅。捫蘿上岑邃。仙屋何廣袤。乳水出其間。涓涓自成溜。凡骨此熏蒸。靈真安可覲。霞壁幾千尋。四字侔篆籀。咸意苔蘚文。誠爲造化授。標之神清洞。民俗未嘗遘。忽覺風雨冥。無能久瞻扣。忽忽遂宵征。勝事皆可覆。但歌縱喧譁。怪說多駸駘。凌晨關塞陽。追賞顏匪厚。窮極四百里。寧憚疲左

右。昨朝書報予。聞甚醉醇酎。所嗟遊遠方。心焉倍如疚。

送河清賈主簿歸任

不遠水雲間。悠悠沂鷓遠。分亭接雞犬。舉酒對河山。殘雪依荒磧。寒烟入暝灣。昔人鸞枳歎。一併在離顏。

河南張應之東齋

昔我居此時。鑿池通竹圃。池清少游魚。林淺無棲羽。至今寒窗風。靜送枯荷雨。雨歇吏人稀。知君獨吟苦。

河南王尉西齋

官舍古城隅。西齋何寂寂。種竹幽趣深。開屏翠光滴。青山露南牆。落日明東壁。危臺起其傍。平隰坐可覲。歲暮野田空。天高霜隼擊。更憐風月時。幾弄林間笛。

余居御橋南夜聞祆鳥鳴效昌黎體

都城夜半陰雲黑。忽聞轉轂聲咿咿。嘗憶楚鄉有祆鳥。一身九首如贅疣。或時月暗過閭里。緩音低語若有求。小兒藏頭婦滅火。閉門雞犬不爾留。我問楚俗何苦爾。云是鬼車載鬼遊。鬼車載鬼奚所及。抽人之筋繫車軸。昔聽此言未能信。欲訪上天終無由。今來中土百物正。安能遂與南方儔。上帝因風如可達。願令驅逐出九州。

僧可真東歸因謁范蘇州 仲淹

姑蘇臺畔去。雲壑付清機。野策過寒水。山童護衲衣。松門正投宿。竹笠帶餘暉。誰愛杼山句。使君應姓韋。

魏屯田知楚州

淮南木葉驚。淮上使君行。天外高帆出。沙頭候吏迎。夜潮通廢埭。秋月滿孤城。正遲文翁化。從來楚俗輕。

和才叔岸傍古廟

樹老垂纓亂。祠荒向水開。偶人經雨踏。古屋爲風摧。野鳥棲塵坐。漁郎奠竹杯。欲傳山鬼曲。無奈楚辭哀。

新安錢學士以近詩一軸見貺輒成短言用敍單悃

早事太尉府。謬以才見論。身作邑中吏。日陪丞相尊。嵩山雲外寺。伊水渡頭村。泉味入香茗。松色開清罇。題詩人半醉。馬上景已昏。歸來屬後乘。冠蓋迎國門。悠悠失貧賤。苒苒歷涼溫。而今處窮僻。落莫思舊恩。終日自鮮適。終年長不言。已覺人事寡。惟聞雞犬喧。東風有來信。滿幅蘭與蓀。深知故人意。遺我滌冥煩。一章言罨畫。谿好如目存。何須到雲壑。便若游花源。一一先造化。可以輕瑤琨。成誦今在口。願將醒病魂。

彼鴛吟

斷木喙雖長。不啄柏與松。松柏本堅直。中心無蠹蟲。廣庭木云美。不與松柏比。臃腫質性虛。朽蝸招猛鶻。主人赫然怒。我愛爾何毀。彈射出窮山。羣鳥亦相喜。啁啾弄好音。自謂得天理。哀哉彼鴛禽。吻血徒爲爾。鷹鷂不搏擊。狐兔縱橫起。況茲樹腹怠。力去宜濱死。

陶者

陶盡門前土。屋上無片瓦。十指不露泥。鱗鱗居大廈。

寓言四首

子規

不如歸去。春山云暮。萬木兮參雲。蜀天兮何處。人言有翼可歸飛。安用空啼向高樹。

提壺

提壺。沽美酒。風爲賓。樹爲友。山花繚亂目前開。勸爾今朝千萬壽。

山鳥

婆餅焦。兒不食。爾父向何之。爾母山頭化爲石。山頭化石可奈何。遂作微禽啼不息。

竹雞

泥滑滑。苦竹岡。雨瀟瀟。馬上郎。馬蹄凌兢雨又急。此鳥爲君應斷腸。

弔礦坑惠燈上人

生棲雲際巖。沒葬寺傍村。破案殘經卷。新墳出樹根。松悲隔溪路。月照舊山門。自昔多詩句。而今幾許存。

范饒州坐中客語食河豚魚

春洲生荻芽。春岸飛楊花。河豚當是時。貴不數魚鰕。其狀已可怪。其毒亦莫加。忿腹若封豕。怒目猶吳蛙。庖煎苟失所。入喉爲鏌鋇。若此喪軀體。何須資齒牙。持問南方人。黨護復矜誇。皆言美無度。誰謂死如麻。吾語不能屈。自思空咄嗟。退之來潮陽。始憚淪籠蛇。子厚居柳州。而甘食蝦蟆。二物雖可憎。性命無舛差。斯味曾不比。中藏禍無涯。甚美惡亦稱。此言誠可嘉。

和元輿遊春次用其韻

乘閑多遠興。信馬與君行。碧樹斜通市。清流曲抱城。山花高下色。春鳥短長聲。日暮吾廬近。還歌空復情。

離蕪湖至觀頭橋

江口泊來久。菰蒲長舊苗。爭鷓洲鷓鬪。遺子浦魚跳。宿岸欣逢戍。歸船競趁潮。時時望鄉樹。已恨白雲遙。

夢故府錢公

故相方來夢。分明接座隅。只知冠劍是。不道死生殊。西府看如舊。東山詠久徂。遽然興寤歎。不覺淚霑鬚。

宿州河亭書事

遠泛千里舟。暫向郊亭泊。觀物趣無窮。適情吟有託。林中鷓舅啼。席上蠅虎攫。雨久草苗盛。田蕪瓜蔓弱。香粳稚子慣。脫粟家人薄。少年都下來。聊問時所作。新衣尙穿束。舊服變褒博。我今貧且賤。短褐隨宜著。

晚泊觀鬪雞

舟子抱雞來。雄雄踔高岸。側行初取勢。俯啄示無憚。先鳴氣益振。奮擊心非慳。勇頸毛逆張。怒目眦裂肝。血流何所爭。死鬪欲充玩。應當激猛毅。豈獨專晨旦。勝酒人自私。粒食誰爾喚。紆懷彼與魏。傍睨當衰漢。徒然驅國衆。曾靡救時難。羣雄自苦戰。九錫邀平亂。寶玉歸大姦。干戈託奇算。從來小資大。聊用一長歎。

廟子灣辭

廟子灣風俗云。有白龜憑險日爲波潮。以驚異上下。余過而作辭云。

我之東來兮。過彼雍丘。舟師奏功兮。濁水湍流。歷長灣兮。勢曲鉤。傾高斗折兮。若奔虬。潛伏怪物兮。深幽幽。發作暴漲兮。爲潮頭。土人立祠兮。在彼沙洲。老木蒼蒼兮。蟬噪啾啾。輸卒引絳兮。蓬首裸體。劇縲囚。赤日上煎兮。膠津蹙氣。塞咽喉。胸盪肩挨。同輓牛。足進復退。不得休。竟持紙幣。挂廟陬。微風飄揚。如喜收。我今語神神聽不。何不歸海事。陽侯穹魚大龜。非爾儔。奚必區區。此汴溝。驚愚駭俗。得肴羞。去就當決。何遲留。

送留廷評之餘姚

越鄉知勝楚。君去莫辭遙。曉日魚蝦市。新霜橘柚橋。河流通海道。山井應江潮。近邑逢鷗鳥。先應避畫橈。送張子野祕丞知鹿邑。

忽作五年別。相逢雙鬢疎。不知從此去。當見復何如。公秫時爲酒。晨庖日有魚。沛譙風物美。聊以樂琴書。

依韻和劉敞秀才

安得采虛名。師道欲吾廣。雖然存術業。曾不計少長。孔孟久已亡。富貴得亦儻。後生不聞義。前輩懼爲黨。退之昔獨傳。力振功不賞。舌吻張洪鍾。小大扣必響。近世復泯滅。務學多忽恍。今子誠有志。方駕已屢枉。自慚懷道淺。所得可下上。正如種青松。而欲託朽壤。典冊皆可尋。聖言皆可仰。幸無增我過。此語固不爽。

送張秀才之淮南

聊爲楚客唱。一送淮南行。出汴遠心喜。移舟孤岫橫。危帆將進浦。寒霧不分城。枚乘舊居處。向來秋草生。

南隣蕭寺丞夜訪別

憶昨偶相親。相親如舊友。雖言我巷殊。正住君家後。壁裏射燈光。籬根分井口。來邀食有魚。屢過貧無酒。明日定徂征。聊茲酌升斗。宵長莫惜醉。路遠空迴首。

讀司馬季主傳贈何山人

長安新雨後。九陌少行人。同輿有宋賈。游市懷隱淪。日聞古賢哲。必與醫卜鄰。來過季主室。再拜語逡巡。矍然悟辭貌。何爲居埃塵。捧腹乃大笑。吾道非爾臻。驥慚罷驢駟。鳳豈燕雀親。筮占聊助上。功利儻及民。大夫與博士。登車若喪神。今我見何遜。始驗太史真。順性誨善惡。不離義與仁。言孝諭爲子。言忠諭爲臣。又得蜀嚴比。寧將日者均。京都盛龜筮。坐肆如魚鱗。噤口不正言。唯能辨冬春。鴻冥復所慕。安得雞鶩馴。

依韻和子聰見寄

嘗念餞行舟。風蟬動去愁。獨登孤岸立。不見遠帆收。及送故人盡。亦嗟歸跡留。洛陽君更憶。寧復醉危樓。

送何遜山人歸蜀

春風入樹綠。童稚望柴扉。遠壑杜鵑響。前山蜀客歸。到家逢社燕。下馬澣征衣。終日自臨水。應知已息機。

新霽望岐笠山謝紫微坐中賦

北望直百里。峨峨千仞青。斷虹迎日盡。飛雨帶龍腥。陰壑煙雲畜。陽崖草木靈。登臨終不厭。時許到茲亭。

代書寄歐陽永叔四十韻

始謫夷陵日。當居建德年。一書冤逐客。四詠繼稱賢。自謂臨江徼。相逢莫我先。白醪封畫榼。素鯉養泓泉。戒吏收山栗。呼童惜沼蓮。只期東浦過。共醉小溪邊。日日占風勢。時時到水堦。安知貪挂席。不肯暫迴船。自爾皆無定。歸歟亦未然。指程幾一月。泝險歷三千。魚鳥都難問。音塵杳莫傳。因之走羸僕。試與訪南遷。比及過牛峽。還聞迎壁田。報言雖不獲。吉語喜多全。我解歸堯闕。君移近漢淵。問途曾未遠。命駕亦何緣。衰野今行矣。隆中有待焉。鄉亭瓜接畛。風化蟻同羶。卽欲朋簪盍。翻爲俗事牽。愛嬰嬌啞啞。嗜寢復便便。雞黍煩爲具。輪轅豈得前。寄聲勤以謝。幸子恕而憐。來貺誠爲望。論情恐未捐。嘗親馬南郡。果謁謝臨川。遂得窺顏色。重忻論簡編。聊咨別後著。大出箴中篇。問傳輕何學。言詩詆鄭箋。飄流信窮厄。探討愈精專。

道舊終忘倦。評文欲廢眠。寧知主人貴。但見左魚懸。所至同風月。相歡憶澗瀟。清歌嗟在耳。素髮怪侵顛。翠堞時登眺。芳洲屢泝泝。難醒撥醅醪。殊厭落頭鮮。坐竹聽啼鳥。臨流聒嘒蟬。孤亭起歸夢。南陌去揚鞭。出餞陪雙旆。方慚歷廣鄆。始生山吏敬。頗釋利途遄。會面辭何吐。離膺事已填。空餘郡樓望。野色際平煙。

雪夜留梁推官飲

晝雪落旋消。夜雪寒易積。燈清古屋深。爐凍殘煙碧。爲沽一斗酒。暫對千里客。酒薄意不淺。輕今須重昔。重昔是年華。飄飄猶過隙。一醉冒風歸。平明馬無跡。

永叔寄澄心堂紙二幅

昨朝人自東郡來。古紙兩軸絨膝開。滑如春冰密如繭。把玩驚喜心徘徊。蜀牋脆蠹不禁久。剡楮薄慢還可哈。書言寄去當寶惜。慎勿亂與人翦裁。江南李氏有國日。百金不許市一枚。澄心堂中唯此物。靜几鋪寫無塵埃。當時國破何所有。帑藏空竭生莓苔。但存圖書及此紙。輦大都府非珍瓌。于今已踰六十載。弃置大屋墻角堆。幅狹不堪作詔命。聊備箴使供鸞臺。鸞臺天官或好事。持歸祕惜何嫌猜。君今轉遣重增愧。無君筆札無君才。心煩收拾乏匱櫃。日畏捲裂防嬰孩。不忍揮毫徒有思。依依還起子山哀。

聞尹師魯赴涇州幘

胡騎犯邊來。漢兵皆死戰。昨聞衛將軍。賢俊多所薦。知君慮不淺。永對未央殿。天子喜有言。輶車因召見。

籌畫當冕旒。袍魚賜銀茜。曰臣豈身謀。而邀陛下睭。青衫出二嶠。白馬如飛電。關山冒風露。兒女泣霜霰。軍客壯士多。劍藝匹夫銜。賈誼非俗儒。慎無輕寡變。

夏日陪提刑彭學士登周襄王故城

聊隨漢使者。一上周王城。片雨北郊晦。殘陽西嶺明。野禽呼自別。香草問無名。誰復黍離詠。但興箕穎情。

新霽登周王城

行行古城頭。歷覽古城下。水鳥傍人煙。河流隔桑柘。秋山豁晴翠。野老親時稼。民訟今已稀。閑登厭官舍。

田家

高樹蔭柴扉。青苔照落暉。荷鋤山月上。尋徑野煙微。老叟扶童望。羸牛帶犢歸。燈前飯何有。白薤露中肥。

田家語

庚辰詔書。凡民三丁籍一。立校與長號。弓箭手用備不虞。主司欲以多媚上。急責郡吏。郡吏畏不敢辨。遂以屬縣令。互搜民口。雖老幼不得免。上下愁怨。天雨淫淫。豈助聖上撫育之意耶。因錄田家之言。次爲文。以俟採詩者云。

誰道田家樂。春稅秋未足。里胥扣我門。日夕苦煎促。盛夏流潦多。白水高於屋。水旣害我菽。蝗又食我粟。前月詔書來。生齒復版錄。三丁籍一壯。惡使操弓鞣。州符今又嚴。老吏持鞭朴。搜索稚與艾。唯存跛無目。

田闕敢怨嗟。父子各悲哭。南畝焉可事。買箭賣牛犢。愁氣變久雨。鐮缶空無粥。盲跛不能耕。死亡在遲速。我聞誠所慙。徒爾叨君祿。卻詠歸去來。刈薪向深谷。

汝墳貧女

時再點弓手。老幼俱集。大雨甚寒。道死者百餘人。自壞河至昆陽。老牛陂。僵尸相藉。

汝墳貧家女。行哭音悽愴。自言有老父。孤獨無丁壯。郡吏來何暴。縣官不敢抗。督遣勿稽留。龍鍾去攜杖。勤勤囑四隣。幸願相依傍。適聞閭里歸。問訊疑猶強。果然寒雨中。僵死壤河上。弱質無以託。橫尸無以葬。生女不如男。雖存何所當。拊膺呼蒼天。生死將奈向。

魯山山行

適與野情愜。千山高復低。好峯隨處改。幽徑獨行迷。霜落熊升樹。林空鹿飲溪。人家在何許。雲外一聲雞。

疲馬

疲馬不畏鞭。暮途知幾千。當須量馬力。始得君馬全。

依韻和永叔子履冬夕小齋聯句見寄

遙知夜相過。對語冷無火。險辭鬪尖奇。凍地抽筍箒。吟成欲寄誰。談極唯思我。學術窮後先。文字少許可。敢將蠶測海。有似脂出輅。必餓嘗見憂。此病各又果。弊駕當還都。重門不須鎖。到時春怡怡。萬柳枝婀娜。定應人折贈。只恐絮已墮。行囊且不貧。明珠藏百顆。永叔嘗見嘲。謂自古詩人。率多寒餓顛困。風原行吟於澤畔。蘇武嚼雪於海上。杜甫凍餒於

未陽。李白窮溺於宣城。孟郊虛全。栖栖道路。以子之才。必類數子。今二君又自爲此態。而反有飯顛之謂。何耶。

仲春同師直至壠山雪中宿穰亭

與子乘羸馬。夜投山家宿。風雪滿綈裘。燈火深竹屋。烹雞賴主人。吠犬憎倦僕。明發到巖前。春莢凍雲木。

和師直早春雪後五壠道中作

來尋谷口春。正值陰雲結。日暮冰霰繁。宿亭孤飯設。侵晨登壠去。始見羣峯列。草凍未抽心。松枯猶抱節。川傍認飛鷺。林上墜殘雪。何意待芳菲。遲留未堪折。

孫主簿惠上黨寺壁胡霈然書墨跡一匣

上黨佛祠何可觀。開元瑞物圖高閣。又有長廊古壁上。復是名輩題丹腹。當時泥用絲作筋。意欲千載無剝落。書奇畫妙了不識。訛傳墨土能治瘡。寺僧不惜人搢取。筆畫遂缺如鳥啄。後來好事恐磨滅。寶刀裁刻泥如剝。取之龕置綠板匣。便寶箱楮同美璞。拂拭還看體勢生。盤屈蒼虬舞鸞鷲。在昔不畏屋壁壞。今也常恐兒童撲。夫君知我心所重。南歸贈以致誠懇。此時雖喜落吾手。老大腕硬無由學。但當拜祝不敢忘。莫爲報言曾未數。

寄永興招討夏太尉代人

寶元元年西夏叛。天子命將臨戎行。二年孟春果來寇。高奴城下皆氐羌。五原偏師急赴敵。晝夜不息趨

戰場馬煩人怠當勁虜。雖持利器安得強。二師覆敗乃自取。豈是廊廟謀不臧。朝廷又選益經略。三幟賢俊務所長。或取李愬備邊策。或欲五道出朔方。仲夏科民挾弓矢。季冬括驢賣道糧。官軍未進復犯塞。塞旗殺將何倡狂。遂令士卒愈沮氣。欲使乘障膽不張。我願助畫跡且遠。側身西望空淒涼。庶幾一言可裨益。臨風欲寄鳥翼翔。所宜畜銳保城壁。轉饋先在通行商。守而勿追彼自困。境上未免小斂攘。譬如蚊虻噬膚體。實於肌血無大傷。此言雖小可喻遠。幸公採用不我忘。誠知公慮若裴度。聖上聽用同憲皇。當時豈不歷歲月。猶且衆鎮未陸梁。況今鷹犬乏雄勇。便擬馳騁徒蒼惶。且緩須時勵犀卒。終期拉朽功莫當。

桓妬妻

昔聞桓司馬。娶妾貌甚都。其妻南郡主。悍妬誰與俱。持刀擁羣婢。逕往將必屠。妾時在窗前。解鬢臨鏡梳。鬢髮雲垂地。瑩姿冰照壺。妾初見主來。綰髻下庭隅。斂手語出處。國破家已殂。無心來至此。豈願奉君娛。今日苟見殺。雖死生不殊。主乃擲刃前。抱持一長吁。曰我見猶憐。何況是老奴。盛怒反爲喜。哀矜非始圖。嫉忌尙服美。傷哉今亦無。

舟次朱家曲寄許下故人

藹藹桑柘岸。喧喧鷄犬村。晚雲連雨黑。秋水帶沙渾。稍聽鄰船語。初分異土言。雖嗟遠朋友。日喜近田園。醉中留別永叔子履

新霜未落汴水淺。輕舸唯恐東下遲。遶城假得老病馬。一步一跛令人疲。到君官舍欲取別。君惜我去頻增嘻。便步髻奴呼子履。又令開席羅酒卮。逡巡陳子果亦至。共坐小室聊伸眉。烹鷄庖兔下筯美。盤實釘飯粟與梨。蕭蕭細雨作寒色。獸獸盡醉安可辭。門前有客莫許報。我方劇飲冠幘欹。文章或論到淵奧。輕重曾不遺毫癡。間以辨諛每絕倒。豈顧明日無晨炊。六街禁夜猶未去。童僕竊訝吾儕癡。談兵究弊又何益。萬口不謂儒者知。酒酣耳熱試發泄。二子尙乃驚我爲。露才揚己古來惡。卷舌噤口南方馳。江湖秋老鱖鱸熟。歸奉甘旨誠其宜。但願音塵寄鳥翼。慎勿卻效兒女悲。

赴雪任君有詩相送仍懷舊賞因次其韻

湖山饒邃處。曾省牧之遊。雁落葑田闊。船過菱渚秋。野煙昏古寺。波影動危樓。到日尋題墨。猶應舊壁留。

歲日旅泊家人相與爲壽

舟中逢獻歲。風雨送餘寒。推年增漸老。永懷殊鮮歡。江邊無車馬。鑑裏對衣冠。孺人相慶拜。共坐列盃盤。盤中多橘柚。未咀齒已酸。飲酒復先醉。頗覺量不寬。岸梅欲破萼。野水微生瀾。來者卽爲新。過者故爲殘。何言昨日趣。乃作去年觀。時節未變易。人世良可歎。

依韻和胡武平懷京下游好

南國易悲愁。西風起高樹。枯荷復送雨。度雁寧知數。欲問北來音。繫書復若故。冥飛杳無跡。弋者徒有慕。

況在白蘋洲。而懷石渠署。石渠多故人。鷓鴣方鴛鴦。鏘鳴尙可希。綵翼何由附。主人賴知己。未變疇昔願。乘桴豈仲尼。好勇非季路。幸依南郡帳。不學邯鄲步。自守終日愚。都忘向時慮。瞻戀此江湖。親年當喜懼。旣獲庭闈近。又多山水趣。邇來對明月。千里猶會晤。長橋人絕聲。舉酒逢秋露。迴聞孤舟笛。煙水在何處。俯檻意無涯。跳波魚夜乳。頗得真隱情。奚須慕巢許。思寄梅枝香。遠隔蘭溪渡。緘之付好風。精爽亦隨去。

送劉成伯著作赴弋陽宰

我昨之官來。值君爲郡掾。當年已知名。是日纔識面。未久嗟還都。始應羣公薦。遂除芸省郎。出治江上縣。縣劇素所聞。其俗到可見。水精製盤盂。冰瑩產郊甸。鳴箏斲桐梓。雕飾雜寶紉。有藥化銅鈿。方士多伏鍊。君今齒尙壯。好學常不倦。二者定非惑。吾言亦狂狷。絃歌將有餘。幸可窮經傳。歸來期著書。篋楮盈百卷。莫學此疎慵。無能守貧賤。明朝君當行。勉勉自出餞。豈無一壺酒。豈無一鼎饌。

冬雷

上帝設號令。隱其南山下。震發固有時。曷常事憑怒。春以動含生。夏以奮風雨。冬其息不用。藏在黃厚土。我今來江南。歲曆惟建午。如何小雪前。向曉疑鳴釜。蛟蛇龜蟲厄。鱗裂口塊吐。蝦蟆不食月。深窟僵兩股。天公豈物欺。若此汨時序。或言非天公。實乃陰怪主。嘗觀古祠畫。牛首椎連鼓。黑雲雜狂飆。相與爲肺腑。是不由昊穹。安能順寒暑。吾因考厥事。復以驗莽鹵。市井欺量衡。定知不活汝。元惡逆大倫。弗加霹靂斧。

此豈曰無私。故予未所取。必恐竊天威。似將文法侮。焉顧五行錯。詎畏萬物覩。欲扣九門陳。恨身無鳥羽。冬日陪胡武平游西余精舍

侵晨霜氣嚴。溪口冰已合。烏榜將進遲。寒篙旋摧拉。遙看松竹深。雪屋藏山衲。登臨興都盡。薄暮淞清響。送崔主簿赴睦州清溪

舟輕不畏險。逆上子陵灘。七里峽天翠。千重雲木寒。古祠鳴野鳥。亂石激春湍。正與高懷愜。寧歌行路難。送潘供奉承勛

與君跡熱情已親。欲將行邁聊感人。舉酒不能效時俗。半辭苦語資立身。長大實好帶刀劍。曷不往助清邊塵。門戟雖高豈自有。當思乃祖爲功臣。所宜勇躍發奇策。嘉名定體庶得真。儻以斯言作狂說。乘肥食脆任青春。

寄題徐都官新居假山

太湖萬穴古山骨。共結峯嵐勢不孤。苔徑三層平木末。河流一道接墻隅。已知谷口多花藥。祇欠林間落狷廳。誰待巾韞此遊樂。里中遺老肯相呼。

依韻和武平別後見寄

溪遠檣危一望遙。此焉悽絕府中僚。已同鴈鷺依清淺。共看鸞皇上泐寥。別岸無端縈細柳。迴舟不忍過

新橋醉來事事能生感。誰道愁腸酒易銷。

過華亭

晴雲鳴鶴幾千隻。隔水野梅三四株。欲問陸機當日宅。而今何處不荒蕪。

迴自青龍呈謝師直

共君相別三四年。巖巖瘦骨還依然。唯髭比舊多且黑。學術久已不可肩。嗟余老大無所用。白髮冉冉將侵顛。文章自是與時背。妻兒啼無一錢。幸得詩書銷白日。豈顧富貴摩青天。而今飲酒亦復少。未及再酌腸如煎。前夕與君歡且飲。飲纔數盞我已眠。鷄鳴犬吠似聒耳。舉頭屋室皆左旋。起來整巾不稱意。掛帆直走滄海邊。便欲騎鯨去萬里。列缺不借霹靂鞭。氣沮心衰計欲睡。夢想先到蘋渚前。與君無復更留醉。醉死誰能如謫仙。

青龍海上觀潮

百川倒蹙水欲立。不久卻迴如鼻吸。老魚無守隨上下。閣向滄洲空怨泣。推鱗伐肉走千艘。骨節專車無大及。幾年養此膏血軀。一旦翻爲漁者給。無情之水誰可憑。將作尋常自輕入。何時更看弄潮兒。頭戴火盆來就涇。

社前

欲社先知雨。將歸未見花。那能長作客。夜夜夢還家。

牡丹

洛陽牡丹名品多。自謂天下無能過。及來江南花亦好。絳紫淺紅如舞娥。竹陰水照增顏色。春服貼妥裁輕羅。時結游朋去尋玩。香吹酒面生紅波。粉英不忿付狂蝶。白髮強插成悲歌。明年更開余已去。風雨摧殘可奈何。

觀居寧畫草蟲

古人畫虎鵠。尙類狗與鷺。今看畫羽蟲。形意兩俱足。行者勢若去。飛者翻若逐。拒者如舉臂。鳴者如動腹。躍者趨其股。顧者注其目。乃知造物靈。未抵毫端速。毗陵多畫工。圖寫空盈幅。寧公實神授。坐使羣輩伏。草根有織意。醉墨得已熟。權豪不可致。節行今仍獨。

悼亡三首

結髮爲夫婦。于今十七年。相看猶不足。何況是長捐。我鬢已多白。此身寧久全。終當與同穴。未死淚漣漣。每出身如夢。逢人強意多。歸來仍寂寞。欲語向誰何。窗冷孤螢入。宵長一鴈過。世間無最苦。精爽此銷磨。從來有修短。豈敢問蒼天。見盡人間婦。無如美且賢。譬今愚者壽。何不假其年。忍此連城寶。沉埋向九泉。

書哀

天既喪我妻。又復喪我子。兩眼雖未枯。片心將欲死。雨落入地中。珠沉入海底。赴海可見珠。掘地可見水。唯人歸泉下。萬古知已矣。拊膺當問誰。憔悴鑑中鬼。

偶書寄蘇子美

君詩壯且奇。君筆工復妙。二者世共寶。一得亦難料。我今或盈軸。體逸思益峭。有如秋空鷹。氣壓城雀鷁。又如飲巨鍾。一舉不能醕。既醕心已醉。顛倒視兩曜。吾交有永叔。勁正語多要。嘗評吾二人。放檢不同調。其於文字間。苦硬與惡少。雖然趣尙殊。握手幸相笑。

送李殿通判處州

拜官將近親。不畏千里險。泝流上贛水。石亂波驚颭。舟人素已諳。曲折就迴閃。豈虞失便利。倚慣憂亦掩。昔余從平流。悸夢尙成覓。今逢子方去。青紵絲新染。沙頭有堠吏。惴立板方斂。鴻鴈正來翔。競看朱服儼。蔡仲謀遺鮒。魚十六尾。余憶在襄城時。獲此魚。留以遲歐陽永叔。

送蘇子美

昔嘗得圓鮒。留待故人食。今君遠贈之。故人大河北。欲膾無庖人。欲寄無鳥翼。放之已不活。烹煮費薪棘。勇爲江海行。風波曾不懼。但欲尋名山。扁舟無定處。南有鵬若鷁。險有石若鋸。毒草見人搖。短狐逢影怒。不遐尙苦乖。更遠饒瘴霧。東土乃濱海。蜃蠃仍可怖。穀物怪瑣屑。羸蜺固無數。鹹腥損齒牙。日月復易舛。

二方既若此。往矣無久駐。竟當西北來。醉耐炙肥豕。夏不厭漿酪。冬不厭雉兔。勿言專口腹。口腹人所務。天台信奇偉。石橋非坦步。廬岳趣最幽。饑腸看瀑布。此致雖爲高。實亦難久慕。君行聽我言。不聽到應悟。

寄洪州致仕李國博

湖上悠然度幾春。勇拋榮祿遂天真。青蒲翠竹圍華屋。白酒黃雞命里人。果下有時乘小駟。兒曹方見擁朱輪。田園歲入千鍾美。肯似疎家苦畏貧。

永叔贈酒

天門多奇醞。一斗市錢千。貧食尙不足。欲飲將何緣。豈能以口腹。屈節事豪權。閉戶飽於蠶。作詩湧如泉。一日復一夕。醒目常不眠。窮臘忽可怪。雙壺故人傳。呼兒欲自酌。瓦盞無完全。其能饜甘脆。而況侑天妍。卻令情懷惡。分與富貴偏。收拾不復嘗。排置屋角邊。儻有嘉客至。傾倒相與顛。何暇問濃薄。但覺窗扉旋。誰識我爲我。賓主各類然。始得語且橫。旣醉論益堅。曾不究世務。閑氣爭古先。畢竟兩未決。辨吻空流涎。嗟我儒者飲。聒耳無管絃。雖云暫歡適。終久還愁煎。自甘不偶死。寧慕金印懸。願頻致此物。勿恤瘡檐肩。

辛著作知西京永寧

躡馬西畿令。家塋在洛陽。衣霑寒食雨。花發故宮牆。冷淡鳩鳴屋。寬閑水滿塘。送君悲漸老。空憶釣伊魴。

正月十五日夜出迴

不出只愁感。出遊將自寬。貴賤依儔匹。心復殊不歡。漸老情易厭。欲之意先闌。卻還見兒女。不語鼻辛酸。去年與母出。學母施朱丹。今母歸下泉。垢面衣少完。念爾各尙幼。藏淚不忍看。推燈向壁臥。肺腑百憂攢。

戲寄師厚生女

生男衆所喜。生女衆所醜。生男走四鄰。生女各張口。男大守詩書。女大逐雞狗。何時某氏郎。堂上拜媼叟。

冬夕會飲聯句

與君數夜飲。唯恐酒盞空。今我苦欲淺。堯臣語志難比同。陳編侑歡適。謝景初間諺何魁雄。婢子寒且倦。堯臣主人哦不窮。燈青屢結花。景初煎響時鳴蟲。穴鼠暗出沒。堯臣風鴈高雍容。冰霜覆瓦屋。景初貂狐輸貴翁。孤床乏暖質。堯臣苦語有淡工。咀嚼患爲小。景初煨炮驚殼紅。落蟾斜入窻。堯臣遠漏徹遞風。醉心欺睡魄。景初細書刺昏瞳。昨呀聞爭犬。哮吼厭啼驄。撥火亂頰豆。附炙雙彎弓。乾果硬迸齒。堯臣寒蠶酸滿胸。枯蛤壁無肉。淡脯燒可饗。語必造聖賢。樂已過鼓鐘。紙窗幸未曙。景初絮被令旋縫。凍痺兩股鐵。跑抓雙鬢蓬。脬尿旣懶溺。視虱唯欲烘。器皿足缺齧。捧執無妖穠。兒女寒不寢。堯臣僮僕困欲瞢。豈無富貴徒。笑此飢寒蹤。丈夫固有負。道義久已充。墨子不黔突。齒輩且得封。勉哉梅夫子。寒者終自通。景初

郡閣閱書投壺和呈相國晏公

較量人世無窮樂。羅列平生未見書。聊奉投壺祭征虜。休言擊劍馬相如。書樓晚去聞寒角。縹帙看來落

蠹魚日獲誨言皆舊學。不慚貧賤帶經鋤。

和欲雪

雪欲漫天落。雲初著地垂。臂鷹過野健。走馬上冰遲。公子多論酒。騷人自詠詩。都無少年意。只臥竹窗宜。

四月二十七日與王正仲飲

我來自楚君自吳。相遇汎波銜舳艫。時時舉酒共笑樂。莫問罌盎有與無。醉憶曩同吾永叔。倒冠落佩來西都。是時豪快不顧俗。留守贈榼少尹俱。高吟持去擁鼻學。雅闋付唱纖腰姝。山東腐儒漫側目。洛下才子爭歸趨。自茲離散二十載。不復更有一日娛。如今舊友已無幾。歲晚得子欣爲徒。

月下懷裴如晦宋中道

九陌無人行。寒月淨如水。洗然天宇空。玉井東南起。我馬臥我庭。帖帖垂頸耳。霜花滿黑鬚。安欲致千里。我僕寢我廐。相背肖兩已。夜深忽驚覺。呼若中流矢。是時與我懷。顧影行月底。唯影與月光。舉止無猜毀。吾交有裴宋。心意月影比。尋常同語默。肯問世俗子。

同蔡君謨江鄰幾觀宋中道書畫

君謨善書能別書。宣獻家藏天下無。宣獻既沒二子立。漆匣甲乙收盈廚。鍾王真蹟尙可觀。歐褚遺墨非因模。開元大曆名流夥。一一手澤存有餘。行草楷正大小異。點畫勁宛精神殊。坐中鄰幾素近視。最辨纖

悉時驚吁。逡巡蔡侯所得。索研鋪紙。纔須臾。一掃一幅。太快健。檀溪躍過瘦的盧。觀書已畢。復觀畫。數軸江吳種稻圖。稻苗秧水拍拍。羣鷺矯翼人荷鋤。陂塍高下石籠密。竹樹參倚荆籬疎。大車立輪轉流急。小犢欺顧穉子驅。令人頻有故鄉念。春事況及蠶桑初。虎頭將軍畫列女。二十餘子拖裙裾。許穆夫人尤窈窕。因誦載馳誠起余。余無書性無田區。美人雖見身老癯。舉頭事事不稱意。不如倒盡君酒壺。

東城送運判馬察院

春風騁巧如剪刀。先裁楊柳後杏桃。圓尖作瓣得疎密。顏色又染燕脂牢。黃鸝未鳴鳩欲雨。深園靜墅聲嗷嗷。役徒開汴前日放。亦將決水歸河槽。都人傾望若焦渴。寒食已近溝已洶。何當黃流與雨至。雨深一尺水一篙。都水御史亦卽喜。日夜順疾回輕舸。頻年吳楚水苦旱。一稔未足生脂膏。吾願取之勿求羨。窮鳥困獸易遞逃。我今出城勤送子。沽酒不惜典弊袍。數途必向睢陽去。太傅太尹皆英豪。試乞二公評我說。萬分豈不益一毛。國給民蘇自有暇。東園乃可資遊遨。

送知和州杜駕部

桐花欲開時。羣囀爭哺兒。但求黃口飫。焉問丹穴飢。常山有四鳥。將飛昔已悲。中間勿殞逝。豈得安其枝。一飲必屢顧。每啄必遲遲。今朝竟矯翼。去向江之湄。銜芹不自食。欲遺孤與雌。此義實已重。莫爲鳥所嗤。世俗多嫌忌。我胡爲此詩。此詩美孝悌。持贈杜挺之。

觀何君寶畫

燕馬易畫。吳牛難圖。馬骨應細。牛骨麤。馬毛要密。牛毛疎。麤疎必辨別。細密多模糊。乃知戴嵩筆。能出韓幹徒。幹馬精神在韁勒。嵩牛怒鬪無牽拘。昨日何家觀小軸。絹雖破爛色不渝。二頭相觸角競倚。前腳如跪後腳舒。尾株榻直脊脊蹙。筋力寫盡蹄腕殊。一勝一敗又苦似。勝者狠逐敗者趨。卷窮赤印置小字。置字乃是陶尚書。尚書國初人。愛畫收幾廚。買時不惜金與帛。帛載羊車錢載驢。後世兒孫不能保。賣入窮市無須臾。凡目矜新不重故。千錢酬直皆笑愚。四牛遂爲何氏有。裝背入眼天下無。坐中吾儕趣已異。又喜玄女傳兵符。此本實稱閻令畫。下筆簡細容顏姝。三人鬼狀一牛首。八女二十美丈夫。黃帝中間蔭葩蓋。霞扇錯玳旌。擁朱冠服難知歲月遠。但見儀衛森清都。復觀鹿臺獨夫受。妲已不笑何由娛。酒池肉林騎行肉。剖心斲脛堪悲吁。數幅吳王宴西子。綵舟張樂當姑蘇。宮娥數百簇高下。鬢髻一一紅芙渠。危峯細浪得平遠。前對洞庭傍太湖。商紂夫差可垂誠。歷世傳玩參盤盂。雕鷹草木不足記。特詠此事心何如。

送少卿張學士知洪州

朱旗畫舸一百尺。五月長江水拍天。穩去先應望廬岳。暫來誰復見龍泉。閣經吏部重爲記。山識吳王舊鑄錢。往跡可尋軍士少。贖書遺逸附青編。

觀楊之美畫

天官乘車建朱旗。赤旛前亞風卷披。二龍緩駕蒼髯垂。印箱傍挈文籍隨。雙驂推輓如畏遲。行從冠服多威儀。水官自有真龍騎。兩佐並跨鯨尾螭。步趨羣吏怪眼眉。雲生海面無端倪。雷部處上相與期。人身獸爪負鼓馳。後有同類挾且隄。次執電鏡風囊吹。青蛇有角魚足髻。上下引導神所施。地官既失不可知。此畫傳是閻令爲。設色鮮潤筆法奇。絹理膩滑雞子皮。吳生龍王多裂墜。八軸展玩忘晨炊。李成山水曉景移。黃荃花竹雀擁枝。韓幹馬本摸搭時。神駿都失存毫釐。日高腹枵眼眈眈。邂逅獲見何言疲。厚謝主翁意不衰。他日飽目看無遺。

李審言遺酒

大梁美酒斗千錢。欲飲常被饑窘煎。經時一滴不入口。漱齒費盡華池泉。昨日靈昌兵吏至。跪壺曾不候報箋。赤泥坵封傾瓦盎。母妻共嘗婢流涎。鄰家葡萄未結子。引蔓垂過高牆巔。當街賣杏已黃熟。獨堆百顆充盤筵。老年牙疎不喜肉。況乃下筯無腥膻。空腸易醉忽酩酊。倒頭夢到上帝前。賜臣蒼龍跨入月。不意正值姮娥眠。無人來顧傍玉兔。便取作腊下九天。拔毛爲筆筆如椽。狂吟一掃一百篇。其間長句寄東郡。東郡太守終始賢。切莫汲竭滑公井。留釀此醕時我傳。

送邵郎中知潭州

張鏡疊吹洞庭外。緣虎帶刀蠻帥迎。且諭漢家綏撫厚。莫言湘守事權輕。木奴洲近霜包熟。班竹林昏野

鳥鳴。賈誼宅邊寒。并在。暫留千騎。漱餘清。

和江鄰幾景德寺避暑

埤蟻不應雨。鳴鳶不生風。鬱氣若甑炊。初陽如火紅。裸膚汗交流。腠體膏將鎔。龍頭費挹酌。犢鼻強遮蒙。常畏俗物來。去避青蓮宮。廣堂鋪琉璃。高簷蔭梧桐。廊壁畫地獄。獄具鑊鋸舂。鐵城何焰焰。鐵牀亦彤彤。誰知炮烙死活間。傳自西域黃面翁。正類人世苦此熱。聲利役使亡西東。京師貴賃幾椽舍。窮煎相似聒欲聾。屋頭朝爨作飲食。枕底夕艾驅蚊蟲。宜爾近巷江夫子。賦詩特壓塵土中。

送趙諫議知徐州及

鹿車幾兩馬幾匹。軫建朱幡騎殼弓。雨過短亭雲斷續。鶯啼高柳路西東。呂梁水注千尋險。大澤龍歸萬古空。莫問前朝張僕射。毬場細草綠蒙蒙。

晨起裴吳二直講過門云鳳閣韓舍人物故作詩哭之

平生交友淚。又哭寢門前。魯叟不言命。楚人空問天。月沉滄海底。星隕太微邊。莫恨終埋沒。文章自可傳。

送王察推縝之鄧州

昔向南陽憶洛陽。秋橙初熟半林黃。車過白水沙痕闊。鴈落鉗盧稻稔長。廢壘漢碑金刻字。古原秦冢石爲羊。太平羽檄何曾有。賓主相歡菊薦觴。

送李中舍襲之宰南鄭

莫問褒中道路難。襄陽直上幾重灘。蒼煙古栢漢高廟。落日荒茅韓信壇。出水槎頭一絲挂。穿虹雨腳兩橋殘。土風大抵如南國。期會先時俗自安。

送石昌言學士

混混拍堤瓜蔓水。軒軒銜尾挂橋船。使君東下只朝夕。父老走迎無後先。古堞秋耕拾銅鏃。長淮瀑雨入壕蓮。鳴猿舞鶴仍持去。不憶承明夜直眠。

書南事

大梁國南門。駟騎方騰趨。波波一何急。蠻冠圍番禺。番禺本無備。前賴魏大夫。大夫築子城。今得守以須。兵雖不滿萬。閉壁堪指呼。老幼轉木石。壯健操矛弧。廩庫得以完。日月不易圖。城中舊無井。魏鑿安轆轤。魏由飛語去。不使立外郛。古稱時有待。淺薄皆謂紆。曲突與爛額。看取報功殊。

七月十六日赴庾而有懷

白日落我前。明月隨我後。流光如有情。徘徊上高柳。高柳對寢亭。風影亂疎牖。我馬臥其傍。我僕倦屈肘。寂寂重門扃。獨念家中婦。乳下兩小兒。夜夜啼向母。問爺若箇邊。天性已見厚。不嗟羈枕孤。不愧棲禽偶。內有子相憶。外有月相守。何似長征人。沙塵聽刁斗。

飲劉原甫家原甫懷二古錢勸酒其一齊之大刀長五寸半其一王莽時金錯刀長二寸半

主人勸客飲勸客無天妍欲出古時物先請射以年我料孔子履久化武庫煙固知陶氏梭飛去風雨天
世無軒轅鏡百怪爭後先復聞豐城劍已入平津淵聊讎二百載儻有書畫傳嗚呼纔十一便可傾舳船
探懷發二寶太公新室錢獨行齊大刀鎌形未環連文存半辨齊皆有模法圓次觀金錯刀一刀平五千
其文如此精銅不蠹蝕肉好鉤婉全爲君舉酒盡跨馬月娟娟

蔡君謨示古大弩牙

黃銅弩牙金錯花銀闌線齒如排沙上立準度可省括箭溝三道前直窠其度四寸寸五刻鎔光歷歷無
纖差蔡侯出此問誰得往年客遺來瑯琊瑯琊築城穿厚壤既獲磨洗爭傳誇莫知歲月孰製作精妙近
世應難加發機高下在分刻今人妄射功仍賒願侯擬之起新法勿使邊兵死似麻

寄題周敦美琨瑤洞

仙人采玉驅雄龍列山剖璞青腔空因邃爲堂曲爲室石乳溜壁光玲瓏仙歸龍去草樹長蔽翳不復人
蹤通指壇買墅下峯下洗斲務欲險怪窮地鱗鹿跡尙莫到安問樵老諸牛童古人未得今已得萬景付
與由天公何當歸來斂頭角任從寶我生白虹陰溪淺水菖蒲綠下有蝦蟆雙眼紅及時佐酒斫兩股勿
使更入明月中

許生南歸

大盤小盤堆明珠。海估眩目迷精麤。斗量入貢由掇拾。未必一一疵類無。不貢亦自有光價。此等固知魚目殊。許生懷文頗所似。暫抑安用頻增吁。倚門老母應日望。霜前稻熟春紅稔。歸來爛炊多釀酒。洗蕩幽憤傾盆盂。九卿有命不愁晚。朱邑當年是嗇夫。

送臨江軍監酒李太博

三江卑濕地。北客宦遊稀。霧氣多成雨。雲蒸易損衣。白醪燒甕美。黃雀下田肥。未辨殊方語。山歌半是非。

送晉原喬主簿

太守登車時。我病不能出。遙期玩海棠。度險馬屢叱。唯畏行邁遲。惡欲及春日。何爲愛此花。曾非桃杏匹。生紅濃復淺。瘦蒂脩且密。湖傍幾十樹。雕盤擁新漆。酒傾琉璃盆。月上歡未畢。縣官同遠宦。簿領無督詰。刻意詠芳菲。追補李杜失。

送樂職方知泗州

長堤凍柳不堪折。窮臘使君單騎行。蘇合輕裘霜莫犯。銅牙大弩吏先迎。山旁楚賈連橋泊。水上禹書寒磬清。試向郡樓東北望。煙波千里月臨城。

和劉原甫十二月十日試墨

海神不朝雪不作。大梁塵土蔽天高。道傍牛喘復誰問。佛寺吹螺空唱嘯。相公跪香恬且佚。陛下減膳心焦勞。因君試墨偶有激。勇辭壯筆揮長刀。子無奈何亦思飲。飲竭甕從舖糟。

十九日出曹門見水牛拽車

只見吳牛事水田。只見黃犂負車輓。今牽大車同一羣。又與騾驢走長陌。邛頭闊步塵蒙蒙。不似綏耕泥涸涸。一夜眠頭向南。越鳥心腸誰辨白。

除夜雪

擊鼓人驅鬼。漫天雪送寒。臘從今日盡。花作舊年看。著樹多還墮。隨風積更乾。明朝預王會。畏溼兩梁冠。

送宣州簽判馬屯田兼寄知州邵司勳

寒溪翠拖碧玉帶。蒼山晴臥蛻骨龍。水邊苦竹抽肥筍。石上老蕨拳紫茸。泊船繫纜宿明鏡。昭亭廟古攢瘦松。陰風雨電潭心起。雲遮北嶺如墨濃。田秧浸綠白鷺立。內史出喜嘉賓從。昔時謝公來養神。蘭肴作椒金作鍾。聯詩姓名名已失。板蠹粉落蟲鳥蹤。我鄉復傳召南化。磨鏤黑石君亦逢。

觀拽龍舟懷裴宋韓李

截春流。築沙坻。拽龍舟。過天池。尾矯矯。角岐岐。千夫推。萬鱗隨。驚鴻鷁。沉魚龜。春三月。輕服時。薄冰殿。習水嬉。馬特特。來者誰。魏公子。人不窺。車麟麟。集其涯。邯鄲倡。士交馳。銀餅索酒傾玻璃。用錢如水贈舞兒。

卻入上苑看鬪雞。擊毬彈金無不爲。適聞天子降玉輦。當門虎脚看大旗。春風吹花入行輦。紅錦百尺爭蛟螭。雲蓋迴綵纜維。明年結客觀未遲。

答劉原甫

生早多交友。常恨會遇稀。每念相笑語。昨是今或非。重惜向時游。出處苦乖違。從今儻有酒。莫問梨栗微。前夕呼我飲。遣奴來扣扉。暗犯風雪往。醉脫冠服歸。夜來新霽月。清吐萬里輝。劉郎戴幅巾。江叟披褐衣。相過無百步。誰虞竊訶譏。三家若循環。但知具甘肥。

十一日垂拱殿起居聞南捷

二月雪飛鷄狗狂。錦衣走馬回大梁。入奏邕州破蠻賊。絳袍玉座開明堂。腰佩金魚服金帶。榻前拜跪稱聖皇。一朝嚴氣變和氣。初令漏泄飛四方。將軍曰青才且武。先斬逗撓兵後強。從來儒帥空賣舌。未到已愁茆葉黃。徊徘徊下自稱疾。詔書切責仍勉當。因人成功喜受賞。親戚便擬封侯王。昔日苦病今不病。銅鼓棄擲無鏢鎗。

十五日雪三首

寒令奪春令。六花侵百花。塘冰膠鷺鶩。野水澀芹牙。擁柱輕於絮。吹墀淨若沙。乳禽饑啄木。誰誤撥琵琶。新雷奮虵甲。密雪鬪鵝毛。正欲裁輕縠。重令著弊袍。沙泉流復凍。煙萼坼還韜。只待鄰醅熟。微聲聽酒槽。

春風九十日。一半已銷磨。準擬看花少。依稀詠雪多。官車猶載炭。菀鶻不離窠。向此興都盡。戴家誰復過。

淘渠

開春溝。畎春泥。五步掘一壟。當塗如壞堤。車無行轍馬無蹊。遮截門戶鷄犬迷。屈曲措足高復低。芒鞋苦滑雨淒淒。老翁夜行無子攜。眼昏失腳非有濟。明日尋者爾瘦妻。手提幼女哭嘶嘶。金吾司街務欲齊。不管人死獸顛啼。

京師逢賣梅花五首

北土只知看杏藥。大梁亦復賣梅花。此心還似庾開府。不惜金錢買取誇。驛使前時走馬廻。北人初識越人梅。清香莫把荼蘼比。只欠溪頭月下杯。憶在鄱君舊國傍。馬穿脩竹忽聞香。偶將眼趁蝴蝶去。隔水深深幾樹芳。曾見竹籬和樹夾。高枝斜引過柴扉。對門獨木危橋上。少婦髻鬟猶戴歸。此去吾鄉二千里。不看素萼兩三年。移根種子誰辛苦。上苑偷來值幾錢。

送胥平叔寺丞赴洛

單車細馬出虎牢。春雲黝黝百舌嚙。穀雨已近花欲盡。秉燭夜飲朝坐曹。因君重思昔日歡。醉筆狂掃嵩丘高。于今零落二十載。縱在各各歎二毛。試探上陽何首烏。刮切仍致苦竹刀。俗情相望亦異此。競欲折

筍籠含桃。

送胡公疎之金陵

綠蒲作帆一百尺。波浪疾飛輕鳥翮。瓜步山傍夜泊人。石頭城邊舊遊客。月如冰輪出海來。江波千里無物隔。自古有恨洗不盡。于今萬事何由白。依稀可記鮑家詩。寂寞休尋江令宅。楊花正飛鮪魚多。食膾舉酒謝河伯。但令甘肥日飽腹。誰用麒麟刻青石。去舸已快風亦便。寧同步兵哭車輓。

送汝陰宰孫寺丞

編郎唱榜燕尾下。潁水落日虵鱗生。綠蒲被岸漁網舉。黃鳥啄葢縲車鳴。吏無詬租官正來。不借魴鱖與吏烹。饋吏人情見里黨。官非喜慢知官清。

吳冲卿出古飲鼎

精銅作鼎土不蝕。地下千年薜花幕。腹空鳳卵留藻文。足立三刀刃微直。左耳可執口可斟。其上兩柱何對植。從誰發掘歸吳侯。來助雅飲歡莫極。又荷君家主母賢。翠羽胡琴令奏側。絲聲不斷玉箏繁。繞樹黃鸝鳴不得。我雖衰苾爲之醉。玩古樂今人未識。

二十四日江鄰幾邀觀三館書畫錄其所見

五月祕府始暴書。一日江君來約予。世間難有古畫筆。可往共觀臨石渠。我時跨馬冒熱去。開厨發匣鳴

鑰魚。羲獻墨跡十一卷。水玉作軸。光疏疏。最奇小楷。樂毅論。永和題尾。付官奴。又看四本絕品畫。戴嵩吳牛望青蕪。李成寒林樹半枯。黃荃工妙白兔圖。不知名姓貌人物。二公對奕旁觀俱。黃金錯鏤爲投壺。粉障復畫一病夫。後有女子執巾裾。牀前紅毯平圍爐。牀上二姝展氍毹。繞牀屏風山有無。畫中見畫三重鋪。此幅巧甚意思殊。孰真孰假丹青模。世事若此還可吁。

依韻和原甫月夜獨酌

月下馬蹄休擾擾。夜涼蟲響競囂囂。一杯獨飲愁何有。孤榻無人膝自搖。北斗柄高天漸轉。小冠簪冷髮微凋。誰知靜對頽然影。竟夕幽懷豈易聊。

與蔣祕別二十六年田棐二十年羅拯十年始見之

我今五十二。嘗苦離別煎。屈指數離別。正去一半年。三君異出處。相見有後先。蔣最會遇早。羅倍晚於田。仕宦比我遲。官資居我前。此亦漫輕量。無限歸荒坵。所喜笑語同。各驚顏貌遷。髮有霜華侵。目有蜘蛛懸。有酒易以醉。有奚徒用妍。醒來念功名。病蠶希蜿蜒。安得有園廬。寬閑近林泉。養魚數千頭。種薤三四廛。餘蔬皆稱此。嘉果值亦然。既無俗造請。窮冬事高眠。困貯白粳稻。酒沽青銅錢。飯過引數杯。令兒誦嘉篇。仰首看赤日。區區隨天旋。朝見出滄海。暮見入虞淵。畢竟將何窮。磨滅愚與賢。億億萬萬載。筋骨非玉堅。桐棺三寸厚。在昔誰免焉。去去欲及時。嗟嗟無由緣。

飲劉原甫舍人家同江鄰幾陳和叔學士觀白鷗孔雀鳧鼎周亞夫印鈿玉寶赫連勃勃龍雀刀

主人鳳皇池。二客天祿閣。共來東軒飲。高論雜談詭。南籠養白鷗。北籠養孔雀。素質水紋織。翠毛金鏤薄。大誇鳧柄鼎。不比龍頭杓。玉印傳條侯。字辨亞與惡。鈿劍刻辟邪。符寶殊制作。未觀赫連刀。龍雀鑄鏗鏘。每出一物玩。必勸衆賓酌。又令三雲髻。行酒何焯約。固非世俗驩。自得閱古樂。聖賢泯泯去。安有不死藥。竟知不免此。烏用強檢縛。開目卽是今。轉目已成昨。歸時見月上。酒醒見月落。恍然如夢寐。前語誠不錯。劉涇州以所得李士衡觀察家號蟾蜍硯其下刻云天寶八年冬端州刺史李元德靈卯石造

示劉原甫原甫方與予飲辨云天寶稱載此稱年僞也遂作詩予與江鄰幾諸君和之

硯如列幕腹如月。又若剖瓢萌強發。鑄題天寶年造之。刺史李元傳自越。剝墓剖瓢我莫分。稱載作年初。辨君君雖能辯猶曰寶。原甫詩云。李侯寶硯劉侯得。寶茲僞物吾何云。仰天大笑飲君酒。硯真硯僞休開口。願封漆匣還與侯。請共江翁獨持守。江詩云。劉侯寶此。物忘。慎勿將心逐名轉。

次韻和景彝閏臘二十五日省宿

君嘗納史似吳兢。又直甘泉馬踏冰。重臘雪花方漫漫。宿廳書架自層層。案頭美酒初溫火。簾底微風欲動燈。永夜未眠鐘已發。此心閑寂是高僧。

次韻和永叔新歲書事見寄

尖風細細欲穿簾。殘雪微銷凍結簷。盞裏醇醪無限滿。鏡中白髮不知添。妍童喜舞開羅幕。小吏愁嘶入硯蟾。幸得從公持直筆。定應無復歎蘼鹽。

李廷老祠部寄荆柑子

踏雪衝風馳小吏。帶霜連葉寄黃柑。擗包欲咀牙全動。舉盞逢衰酒易酣。書尾自題知遠意。筆頭親答厭多談。故人莫覓新詩卷。都似嵇康七不堪。

韻語答永叔內翰

世人作肥字。正如論饅頭。厚皮雖然佳。俗物已可羞。字法歎中絕。今將五十秋。近日稍稍貴。追蹤慕前流。曾未三數人。得與古昔儔。古人皆能書。獨其賢者留。後世不推此。但務於書求。不知前日工。隨紙泯已休。顏書苟不佳。世豈不寶收。設如楊凝式。言且直節脩。又若李廷中。清慎實罕俦。乃知愛其書。兼取爲人優。豈書能存久。賢哲人焉瘦。非賢必能此。惟賢乃爲尤。其餘皆泯泯。死去同馬牛。太尹歐陽公。昨日喜疾瘳。信筆寫此語。謂可忘病憂。黃昏走小校。寄我東郭陬。綴之輒成篇。聊以助吟謳。

次韻和長文社日禡祀出城

曉出春風已擺條。應逢社伯馬蹄驕。壇邊宿雨微霑麥。水上殘冰壅過橋。燕子飛來依約近。鴈行歸去試

教調北扉西掖多才思。相與飄飄在汝家。

次韻和長文禊祀郊外見寄並呈韓子華

鶉鴝知雨在桑中。雄逐雌飛自不同。胡粉未生輕蝶白。燕脂先綻野櫻紅。高高樹裏鞦韆月。獵獵牆頭蔕
蕾風。曉下祠壇多寄咏。衣冠方侍大明宮。

送馬行之都官

昭亭山下送君時。不畏西行劍棧危。笮馬跨來身更健。吳船乘去計非遲。錢塘湖上尋雲屋。巾子峯前種
槿籬。此趣已高天下士。不須功業似鷗夷。

次韻和永叔石枕與笛竹簟

溪上枕剖龍卵石。斲匠篋製虵皮紋。客從東方一持贈。竹色蒸青石抱雲。磨沙斲骨自含潤。飽霜弔節無
留塵。京師貴豪空有力。六月耐此炎蒸劇。旱風赤日吹熱來。大廈高簷任雕飾。頭臚汗匝無富貧。雖有殞
冰論官職。官高職重冰則多。日永冰消難更得。唯公掃室施枕簟。迎涼自感東方客。東方客應非俗昏。能
使賢人心體適。賢人何以偏伏人。天下才名方赫赫。我吟困窮不可聽。晝夜蚊蚋蒼蠅聲。蠅如遠鷄耳初
感。蚊若隱雷空際鳴。葛厨頂綻屋蝸墮。菅席中裂麻經橫。平生賦分只煎炒。安有綠玉琉璃清。猶勝昔年
杜子美。老走耒陽牛彘死。因思楊惲廢時言。但願人生行樂爾。公今事業在朝廷。去就尤當慎終始。待公

睡足秋風來去奉高談揮塵尾。

次韻和景彝省闈宿齋

晝日南宮雨後涼。齋嚴官重靜於常。庭前鬪雀墮還起。欄下秋花落自香。看盡雲容天漏碧。讀殘書帙卷披黃。九衢塵土莫能到。蕭瑟微風葉響廊。

次韻和景彝對月

蕭蕭風雨變涼意。索索晚雲開斗晴。已洗浮埃天外靜。忽生圓月樹頭明。草根蟲穴吟來久。屋角星河落更清。我媿西垣侍臣比。影寒霜髻兩三莖。

次韻答吳長文內翰遺石器八十八件

山工日斲器。殊匪事樵牧。掘地取雲根。剖堅如剖玉。食具與果具。待賓良有勗。亦將茶具并。飽啜時出俗。公何都贈予。金多不入目。我家固宜之。瓦椀居漏屋。得此尤稱窮。客來無不足。唯應赤腳婢。收拾怨常酷。夏席堆青蘘。冬盤釘旨蓄。竟無梁肉饌。甚媿蕭家錄。

送番禺杜杆主簿

行識桄榔樹。初窺翡翠巢。地蒸蠻雨接。山潤海雲交。訟少通華語。蟲多入膳庖。不須思朔雪。梅吐臘前梢。

次韻和永叔飲余家詠枯菊

今年重陽公欲來。旋種中庭已開菊。黃金碎翦千萬層。小樹婆娑嘉趣足。髻頭插葉惜光輝。酒面浮英愛芬馥。旋種旋摘趁時候。相笑相尋不拘束。各看華髮已垂顛。豈更少年苔色綠。自茲七十有三日。公又聯鑣入余屋。塔傍猶見舊枯叢。根底歎青芽催促。但能置酒與公酌。獨欠琵琶彈啄木。所歡坐客盡豪英。槐上凍鴟偷側目。盤中有肉鴟伺之。烏鳥不知啼鶯曲。諸公醉思索筆吟。吾兒暗寫千毫禿。明日持詩小吏忙。未解宿醒聊和屬。

和王景彝正月十四日夜有感

燈光暖熱夜催春。天半樓開飲近臣。馳道橫頭起山岳。露臺周匝簇車輪。隔簾艷色多相照。下馬輕豪各競新。我已暮年殊趣嚮。濃油一盞按邊身。

次韻和永叔雨中寄原甫舍人

賴得春巢燕未歸。高簷終日雨衰衰。細籠芳草踏青後。欲打梨花寒食時。美景已嗟空過盡。名園猶許悞相隨。錦鞍切莫九衢去。拍拍一如鵝鴨池。社日曾愼赴北園。

和劉原甫復雨寄永叔

塔下青苔欲染衣。晴光纔漏又霏微。衝風燕子啣泥去。隔樹鶉鴒噴婦歸。乍冷乍陰將禁火。自開自掩不關扉。渾身酸削懶能出。莫怪與公還往稀。

送羅職方知秀州

陸雲嘗誇千里莼。便輕羊酪同埃塵。君今得郡正千里。已患無羊厭此珍。乃知南北各所樂。乘舟不如乘馬惡。水邊不見秦羅敷。縱有西施肌肉薄。使君事事未稱意。綠水芙蓉定何若。

寄懷劉使君致

昔我從仲父。三年在河內。春游丹水上。花竹弄粉黛。人誇走馬來。盡眼看沒背。薄暮半醉歸。插花紅簇隊。使君今少年。時往勸耕耒。安行過樹下。野杏正破類。何不學山公。酩酊還倒載。令人知使君。心膽不瑣碎。切莫懲婦翁。慷慨臨并代。一朝由謗譎。雖去民苦愛。實計幸不幸。豈較進與退。因書寄此懷。繩墨老且悔。

寄汶上

大第未嘗身一至。人猜巧宦我應非。彈冠不讀先賢傳。說劍休更短後衣。瘦馬青袍三十載。故人朱轂幾多違。功名富貴無能取。亂石清泉自憶歸。

諭鳥

百鳥共戴鳳。惟欲鳳德昌。願鳳得其輔。咨爾孰可當。百鳥告爾間。惟鳥最靈長。乃呼鳥與鵠。將致庶鳥康。鳥時來佐鳳。署置且非良。咸用所附已。欲同助翱翔。以燕代鴻鴈。傳書識暄涼。鸚鵡代鸚鵡。剝舌說語詳。禿鶴代老鶴。乘軒事昂藏。野鶉代雄鷄。爪觜稱擅場。雀豹代鵬鶚。搏擊肅秋霜。蝙蝠嘗入幕。捕蚊夜何忙。

老鷓啄臭腐。盤飛使游揚。鵠鷓與梟鷂。待以爲非常。一朝百鳥厭。讒鳥出遠方。鳥伎亦止此。不敢戀鳳傍。養子頗似父。又貪噪豺狼。爲鳥鳥不伏。獸宜爲爾戕。莫如且斂翮。休用苦不量。吉凶豈自了。人事亦交相。

答裴送序意

我欲之許子有贈。爲我爲學勿所偏。誠知子心苦愛我。欲我文字無不全。居常見我足吟詠。乃以述作爲不然。始曰子知今則否。固亦未能無諭焉。我於詩言豈徒爾。因事激風成小篇。辭雖淺陋頗剋苦。未到二雅未忍捐。安取唐季二三子。區區物象磨窮年。苦苦著書豈無意。貧希祿廩塵俗牽。書辭辯說多碌碌。吾敢虛語同後先。唯當稍稍緝銘誌。願以直法書諸賢。恐子未諭我此意。把筆慨嘆臨長川。

薛九公期請賦山水字詩

薛公堂懸山水字。請我試作山水詩。呼童磨墨慰君意。強作安得有好辭。昔年曾是杜陵客。東城水上橫此碑。字方數尺形勢健。豈似取次筆畫爲。東城父老語於我。推本胤自開元時。不知當時何所用。費功錢刻爲瓌奇。我去長安十載後。此石誰輦來京師。苑中構殿激流水。暮春脩禊浮酒卮。是時詞臣出不意。酒半使賦或氣萎。日斜鳴蹕不可駐。未就引去加鞭笞。脫我幸得預此列。玉階立寫從然其。今雖下筆不稱意。已書滿幅令君嗤。

韓欽聖問西洛牡丹之感

韓君問我洛陽花。爭新較舊無窮已。今年誇好方絕倫。明年好更還相比。君疑造化特着意。果乃區區可羞恥。嘗聞都邑有勝意。既不鍾人必鍾此。由是其中立品名。紅紫葉繁矜色美。萌芽始見長蒿萊。氣焰旋看壓桃李。乃知得地偶增異。遂出羣葩號奇偉。亦如廣陵多芍藥。閭井荒殘無可齒。淮山遼秀付草樹。不產髦英產佳卉。人於天地亦一物。固與萬類同生死。天意無私任自然。損益推遷寧有彼。彼盛此衰皆一時。豈關覆燾爲偏委。呼兒持紙書此說。爲我緘之報韓子。

初冬夜坐憶桐城山行

我昔吏桐鄉。窮山使屣躡。路險獨後來。心危常自怯。下顧雲容容。前溪未可涉。半崖風颯然。驚鳥爭墮葉。脩蔓不知名。丹實坼在莢。林端野鼠飛。緣挽一何捷。馬行聞虎氣。豎耳鼻息歛。遂投山家宿。駭汗衣尙浹。歸來撫童僕。前事語妻妾。吾妻常有言。艱勤壯時業。安慕終日閒。笑媚看婦靨。自是甘努力。於今無所懼。老大官雖暇。失偶淚滿睫。書之空自知。城上鼓三疊。

雪後資政侍郎西湖宴集偶書

潭心不凍處。鴈鷺自相依。積雪正無際。因風忽起飛。初驚如避弋。復下信忘機。偶得從公飲。聊書此景歸。

元日

昔遇風雪時。孤舟泊吳埭。江湖未應浦。盡室坐相對。行庖得海物。鹹酸何瑣碎。久作北州人。食此欣已再。

是時值新歲。慶拜乃唯內。草率具盤餐。約略施粉黛。舉杯更獻酬。各爾祝鯨背。咀橘齒病酸。目已驚老態。豈意未幾年。中路苦失配。嘉辰衆所喜。悲淚我何耐。曩歡今已哀。日月不可賴。前視四十春。空期此身在。世事都厭聞。讀書未忍退。過目雖已忘。寧捨心久愛。何當往京口。竹里翦荒穢。行歌樂暮節。薪菽甘自刈。

寄滁州歐陽永叔

昔讀韋公集。固多滁州詞。爛熳寫風土。下上窮幽奇。君今得此郡。名與前人馳。君才比江海。浩浩觀無涯。下筆猶高帆。十幅美滿吹。一舉一千里。只在頃刻時。尋常行舟艫。傍岸撐牽疲。有才苟如此。但恨不勇爲。仲尼著春秋。貶骨嘗苦咎。後世各有史。善惡亦不遺。君能切體類。鏡照嫫與施。直辭鬼膽懼。微文姦魄悲。不書兒女書。不作風月詩。唯存先王法。好醜無使疑。安求一時譽。當期千載知。此外有甘脆。可以奉親慈。山蔬采筍蕨。野膳獵麋麋。鱸膾古來美。梟肉今且推。夏果亦瑣細。一一舊頗窺。圓尖剝水實。青紅摘林枝。又足供宴樂。聊與子所宜。慎勿思北來。我言非狂癡。洗慮當以淨。洗垢當以脂。此語同飲食。遠寄入君脾。

樊推官勸予止酒

少年好飲酒。飲酒人少過。今旣齒髮衰。好飲飲不多。每飲輒嘔泄。安得六府和。朝醒頭不舉。屋室如盤渦。取樂反得病。衛生理則那。子欲從此止。但畏人譏訶。樊子亦能勸。苦口無所阿。乃知止爲是。不止將如何。感春之際。以病止酒。水丘有簡云。時雨乍藏。物景鮮麗。疑其未是。止酒時。因成短章奉答。

東風固無跡。何處見春歸。士逐草心坼。雨兼花片飛。雖憐柔甲長。只恐艷條稀。君但惜晴景。休言止酒非。

答宋學士次道寄澄心堂紙百幅

寒溪漫楮春夜月。敲冰舉簾勻割脂。焙乾堅滑若鋪玉。一幅百錢曾不疑。江南老人有在者。爲予嘗說江南時。李主用以藏祕府。外人取次不得窺。城破猶存數千幅。致入本朝誰謂奇。漫堆閑屋任塵土。七十年來人不知。而今制作已輕薄。比於古紙誠堪嗤。古紙精光肉理厚。邇歲好事亦稍推。五六年前吾永叔。贈予兩軸令寶之。是時頗敝此本末。遂號澄心堂紙詩。我不善書心每愧。君又何此百幅遺。重增吾赧不敢拒。且置縑箱何所爲。

春寒

春晝自陰陰。雲陰薄更深。蝶寒方斂翅。花冷不開心。亞樹青帘動。依山片雨臨。未嘗辜景物。多病不能尋。

答韓三子華韓五持國韓六玉汝見贈述詩

聖人於詩言。曾不專其中。因事有所激。因物興以通。自下而磨上。是之謂國風。雅章及頌篇。刺美亦道同。不獨識鳥獸。而爲文字工。屈原作離騷。自哀其志窮。憤世嫉邪意。寄在草木蟲。邇來道頗喪。有作皆言空。煙雲寫形象。葩卉詠青紅。人事極諛諂。引古稱辯雄。經營唯切偶。榮利因被蒙。遂使世上人。只曰一藝充。以巧比戲奕。以聲喻鳴桐。嗟嗟一何陋。甘用無言終。然古有登歌。緣辭合徵宮。辭由士大夫。不出於瞽矇。

予言與時輩。難用猶篤癡。雖唱誰能聽。所遇輒瘖聾。諸君前有贈。愛我言過豐。君家好兄弟。響合如笙簧。雖欲一一報。強說恐非衷。聊書類頑石。不敢事磨礱。

前以詩答韓三子華後得其簡因敘下情

前者報君詩。妄說良有以。昔予在京師。多爲人所詆。短章然無工。實未甘藝比。因君有過褒。聊且發憤悱。何言敢爲師。乃是貴不蹙。平常遭口語。攢集猶毒矢。此論苟一出。是非必蜂起。偶爾道瘖聾。多疑已竊指。雖恃不欺衷。恨未致速死。安得二頃田。歸耕曷爲恥。誰能事州郡。鷄狗徒聒耳。

汝州王待制以長篇勸予復飲酒因謝之

前因飲酒多。乃苦傷營衛。嘔血踰數升。幾乎成病肺。上念父母老。下念妻兒稚。不死常抱痾。於身寧自貴。樊子來勸我。止酒良有謂。公復遺我詩。責我詞甚毅。指以年齒衰。非酒何養氣。春飲景可樂。夏飲暑可避。秋飲心忘愁。冬飲暖勝被。醉歌人不怪。醉言人不忌。在酒功實多。止酒酒何罪。假如壽九十。今子已半世。不飲徒自苦。未必止爲利。胡汨妄與真。恐乖達者意。屈原吟澤畔。方悟獨醒累。子居今之時。安免人病議。是以告子勤。子守亦謬計。我讀纔一過。不覺顏起愧。自茲願少飲。但不使疾熾。書此以謝公。公言誠有味。

洛陽牡丹

古來多貴色。歿去定何歸。清魄不應散。艷花還所依。紅棲金谷妓。黃值洛川妃。朱紫亦皆附。可言人世稀。

和歐陽永叔啼鳥十八韻

南方窮山多野鳥。百種巧口乘春鳴。深林參天不見日。滿壑呼嘯誰識名。但依音響得其字。因與爾雅殊形聲。我昔曾有禽言詩。粗究一二啼嚙情。苦竹岡頭泥滑滑。君時最賞趣向精。餘篇亦各有思致。恨未與盡衆鳥評。君今山郡日無事。靜聽鳥語如交爭。提壺相與來勸飲。戴勝亦助能勸耕。我念此鳥頗有益。如欲使君勤以行。勸耕幸且強職事。勸飲亦冀無獨醒。杜鵑蜀魄哭歸去。小人懷土慎勿聽。城頭春鳩自謂拙。鵲巢輒處安得平。高窠喬木美毛羽。呀吭葉底無如鶯。口中調簧定何益。下啄蚯蚓孰曰清。自餘多類不足數。一一推本煩神靈。我居中土別無鳥。老鴉鸚鵡方縱橫。教雛叫噪日羣集。豈有勸酒花下傾。願君切莫厭啼鳥。啼鳥於君無所營。

和王仲儀詠瘦二十韻

汝水出山險。汝民多病瘦。或如鷄精滿。或若猿嘍並。女慙高掩襟。男大闊裁領。飲水擬注壺。吐詞侔有鯁。樗里旣已聞。杜預亦不幸。秦人號智囊。吳瓠繫狗頸。臆臚常住頤。伶仃安及脛。只欲仰問天。無由俯窺井。挾帶歲月深。冒犯風霜冷。厭惡雖自知。剖割且誰肯。不唯羞把鏡。仍亦愁弔影。內燎煩羊羸。外砭費針穎。在木曰楠榴。剝之可爲皿。此誠無所用。旣有何能辟。音屏膨脝廁無首。臃腫異臚頂。難將面目施。可與胎胞逞。賢哉臨汝守。世德調金鼎。氓俗雖醜乖。教令日脩整。風土恐隨遷。晨昏憂屢省。儻欲使慈顏。名城不難

請。

憶吳松江晚泊

念昔西歸時。晚泊吳江口。回堤遡清風。淡月生古柳。夕鳥獨遠來。漁舟猶在後。當時誰與同。涕憶泉下婦。使者自隨州來。知尹師魯寓止僧舍。語其處物景甚詳。因作詩以寄焉。

驛使話漢東。故人遷謫處。所居雖非居。有樹卽嘉樹。日膳或雞狗。時蔬多筍芋。夜堂虵結蟠。晝戶鵲噪聚。著書今未成。愛靜已得趣。予欲訪其人。炎蒸未能去。

憶將渡楊子江

月暈知天風。舟人夜相語。平明好挂帆。白浪須出浦。此身猶在吳。歸夢預到楚。今日念同來。吾妻已爲土。

依韻和晏相公

微生守貧賤。文字出肝膽。一爲清潁行。物象頗所覽。泊舟寒潭陰。野興入秋蒺。因吟適情性。稍欲到平淡。苦辭未圓熟。刺口劇菱芡。方將挹溟海。器小已激灑。廣流不拒細。愧抱獨慊慊。疲馬去軒時。戀嘶芻秣減。茲繼周南篇。短撓寧及艦。試知不自量。感涕屢揮摻。

途中寄上尙書晏相公二十韻

驚鷗入林鴉亂飛。舞空落葉相追隨。秋權摧物不見跡。但使萬古生愁悲。登山臨水昔感別。身作旅人安

得宜。單舟匹婦更無婢。朝飧每愧婦親炊。平生獨以文字樂。曾未敢恥貧賤爲。官雖寸進實過分。名姓已被賢者知。疎愚生不謁豪貴。守此退縮行將衰。潁州相公乘道德。一見不以論高卑。久調元化費精力。猶且未倦刪書詩。唐之文章別蕪穢。織悉寧有差毫釐。謂其耽學可與語。便語淵奧祛僂疑。浮言近意不歷口。直欲海窟拏蛟螭。再拜膝前荷勤誨。垂橐稱載歸忘饑。解艇水驛無幾舍。新詩又遣牙兵持。上言行李覽物景。聊可與婦陳酒卮。下言狂斐頗及古。陶韋比格吾不私。相公貴且事翰墨。我輩豈得專遊嬉。今將蒿芹薦俎豆。定亦不以微薄遺。嘗令有詠無巨細。當因川陸舟車貽。日對順流思疾置。老魚姦怯潛鱗鬚。

奉和子華持國玉汝來飲西軒

我誠官局冷。終日事靡枯。每耽古人書。似與世俗闊。同道三四人。來過慰飢渴。迭相陳語言。曾未厭刀咀。日中將過晡。留飯具麤糲。薄酒旣以斟。不覺寒日沒。愚妻方罷沐。供飲愧倉卒。凍婢昧煎和。親調首忘髻。每食各驚顧。誰謂不黔突。倦僕暖吾薪。饑馬飽吾秣。馬無歸嘶聲。僕有顏色活。安穩不知疲。明缸仍爲撥。醉言實無次。曾未窮本末。諸君競相先。出口論莫奪。復云天地間。此能有幾達。我聞顏汗下。恐後謗難遏。其間常有言。但未見疵鬻。終當輕有若。悔目已屢恥。莫入反信哉羣玉林。豈得依朽枿。吾心爲之然。收舌如斷割。寄音謝豪俊。茲蘊只圭撮。

依韻和持國新植西軒

開池臨廣衢。崇崇十餘畝。新軒稍偏北。治圃亦西酉。盎中植菌菘。水不過升斗。小桂未得地。驗活徒搯朽。上乏幽禽啼。下多穴蟻走。藥苗雖無補。欲比山中有。澆灌同一時。萌芽或先後。松株不滿尺。廊廟色已厚。稟性久且堅。物理豈無偶。櫻欄仍未大。散葉纔八九。夏綠與冬青。各各自爲友。吾軒還處西。脩竹爾後取。兩莫論是非。但可吟對酒。

送韓八太祝歸京師求醫

少年潔而腴。茸茸頰有鬚。冒熱跨馬去。去去天王都。借問去何謂。就醫將疾驅。客曰實誑我。健壯其非夫。敢告固不給。但怪所見愚。脊者未必病。病者未必癯。天馬不着肉。日走萬里途。山熊豈無膏。養體唯恐補。滯結在於內。安得形飢膚。厥貌雖美好。厥疾勿須臾。療之欲其漸。熾之非愛軀。此行不飲別。安得持酒壺。

同諸韓及孫曼叔晚遊西湖二首

晚日城頭落。輕鞍葉下涼。野蜂啣水沫。舟子剝菱黃。木老識秋氣。徑幽聞草香。幅巾聊去檢。不作楚人狂。爍電未成雨。涼風先入衣。青天忽開影。紅日尙餘暉。蛺蝶作團起。蜻蜓相戴飛。嘲謔不覺夕。跨馬月中歸。

七月二十一夜聞韓玉汝宿城北馬鋪

暗樹秋風擺葉鳴。桃枝竹簟冷逾清。孤燈淡淡短亭客。半夜蕭蕭聞雨聲。

得曾鞏秀才所附滁州歐陽永叔書答意

客從淮上來。往問故人信。袖銜藤紙書。題字遠已認。既喜開其封。固覺減吾吝。新詩不作寄。乃見子所慎。向來能如今。豈有得觀壘。南方歲苦熱。生蝗復饑饉。憂心日自勞。霜髮應滿鬢。知予欲東歸。曉夕目不瞬。貧難久待乏。薄祿藉霑潤。雖爲委吏冗。亦自甘以進。相望未得親。終朝如抱疹。

裴如晦自河陽至同韓玉汝謁之

朝聞單騎歸。徑走至其第。扣門童僕頑。拒我色甚戾。不顧遂登堂。有馬堂下繫。辨詐大呼卿。稍應西屋際。逡巡冠帶出。青綬何曳曳。有似縮殼龜。藏頭非得計。况與二三子。交分久已締。恕爾避客尤。新還復新墜。

鴨雛

春鴨日浮波。羽冷難伏卵。嘗因鷄抱時。託以鷄窠暖。三旬殼既坼。乳毛寒脰短。雞寧辨其雛。翅擁情款款。一日向水涯。所稟殊未斷。泛然去中流。鷄呼心寘寘。人之苟異懷。負義不足算。有志在養毓。勿論報德限。

杜挺之贈端溪圓硯

雪壓古寺深。中有臥病客。訪之語久清。飢馬齧庭栢。按頭蠻溪硯。其狀若圓壁。指此欲爲贈。而將助吟席。非意予敢貪。既拒頗不懌。大出褚中有。素許當自擇。強持慰勤心。歸以示朋戚。晒曰豈其然。爲汲寒泉滌。滌彼僞飾物。紙乾見頑石。清晨走髻奴。無厭願求易。拜賜遂如初。明月懷吞蝕。微分鸚目瑩。尙漬墨花碧。詞答謂我愚。悔復料已逆。明日未央朝。執手笑啞啞。

對雪憶往歲錢塘西湖訪林逋三首

昔乘野艇向湖上。泊岸去尋高士初。折竹壓籬曾礙過。卻穿松下到茅廬。
旋燒枯栗衣猶濕。去愛峯前有徑開。日暮更寒歸欲懶。無端撩亂入船來。
樵童野犬迎人後。山葛棠梨案酒時。不畏尖風吹入牖。更教牀畔覓鴟夷。

寄題滁州醉翁亭

琅琊谷口泉。分流漾山翠。使君愛泉清。每來泉上醉。醉纓濯潺湲。醉吟異憔悴。日暮使君歸。野老紛紛至。
但留山鳥啼。與伴松間吹。借問結廬何。使君游息地。借問醉者何。使君閒適意。借問鑄者何。使君自爲記。
使君能若此。吾詩不言刺。

送張太博通判袁州

君非身尤謫南州。南方尙鬼其俗媮。蛇爲鄰。虎爲陬。丹茅苦竹深幽幽。邑人祠鬼拜古樹。竹杯一仰來烹
牛。牛死齧屨常不幸。誰得禁止專鋤鉤。借曰未信君且往。民將語怪君聽不。仰山頭。有行舟。

古鑑

古鑑得荒塚。土花全未磨。背菱尖尙在。鼻獸角微訛。月暗蝦蟆蝕。塵昏魍魎過。但令光彩發。表裏是山河。

戊子三月二十一日殤小女稱稱三首

生汝父母喜。死汝父母傷。我行豈有虧。汝命何不長。鴉雛春滿窠。蜂子夏滿房。毒螫與惡噪。所生遂飛揚。理固不可詰。泣淚向蒼蒼。

蓓蕾樹上花。瑩潔昔嬰女。春風不長久。吹落便歸土。嬌愛命亦然。蒼天不知苦。慈母眼中血。未乾同兩乳。高廣五寸棺。埋此千歲恨。至愛割難斷。剛性到以鈍。淚傷染衣斑。花惜落蒂嫩。天地既許生。生之何遽困。送施景仁太博提點江南坑冶。

楚山豈無銅。楚匠豈不工。大鑪常乏鑄。碧井那得充。積弊在鄉縣。孰肯以利籠。君今承詔行。論民當得中。苟能使之發。亦莫取之窮。此乃事可久。山深山自通。

夜泊虹縣同施景仁太博河上納涼書事

與君愛清風。移榻就明月。月落見星繁。星繁如晝熱。霑衣輕露墜。響岸崩湍齧。坐思都城時。誰許脚不轆。

淮雨

兩腳射淮鳴。萬鏃跳點起。漚魚亂目。濕帆遠遠來。未收雲漏斜。陽生半幅。

雜詩絕句十七首 自此寶應道中起慶曆七年夏

蛙行動萍葉。悞觀作游魚。稍稍引兩股。已變科斗書。青草生水中。日日隨水長。水落何所依。撩亂爲宿莽。

有蟲託斷葑。斷葑日夕流。不知止息處。隨天非自由。
荒冰浸籬根。籬上蜻蜒立。魚網挂遶籬。野船籬外入。
茸茸翦熟絲。雨染燕脂暈。滿樹斂黃昏。槿花無此分。
青青老鏡葉。下有繁實尖。浪頭撥船女。刺手終不嫌。
岸傍草樹密。往往不知名。其間有啼鳥。似與船相迎。
青蠅何處來。聚集滿盤間。誰知腹中物。變化如循環。
水上賣瓜女。摘瓜陂上田。長麻已不識。滿把青銅錢。
買魚問水客。始得鯽與魴。操刀欲割鱗。跳怒鬢鬣張。
沙頭風雨來。帖水野雲黑。如觀曹公營。萬弩射船側。
前時雙鴛鴦。失雌鳴不已。今更作雙來。還悲舊流水。
度水紅蜻蜒。傍人飛款款。但知隨船輕。不知船去遠。
塘上挽船人。塘泥深及脛。落日望前村。心將道途競。
燕立茅屋脊。燕啣芹岸泥。巢成同養子。薄暮亦同棲。
鷓銜高樹蟬。危脇綠車響。露腹不曾肥。殺之嗟已枉。

河畔有釣翁。團泥爲甕缶。坐想秦人聲。思傾杜陵酒。

褐山磯上港中泊

風惡舟難進。聊依浦裏村。岸潮生蓼節。灘浪聚蘆根。日腳看看雨。江心漸漸昏。篙師知蟹窟。取以助清樽。

別後寄永叔

前日辭親淚。又爲別友出。愁極反無言。欲言詞已窒。荷公知我詩。數數形美述。茲道日未堙。可與古爲匹。孟盧張賈流。其言不相斲。或多窮苦語。或特事豪逸。而於韓公門。取之不一律。乃欲存此心。欲使名譽溢。竊比於老郊。深愧言過實。然於世道中。固且異謗嫉。交情有若此。始可論膠漆。

宿邵埭聞雨因買藕芡人姻呈永叔

秋雨雁來急。夜舟人未眠。亂風燈不定。暝色樹相連。寒屋猛添響。溼窗愁打穿。明朝持藕使。書此寄公前。

寄許主客

昨日山光寺前雨。今朝邵伯堰頭風。野雲不散低浸水。魚艇無依尙蓋蓬。藕味初能消酒渴。蓼芳猶愛照波紅。揚州有使急迴去。敢此寄聲非塞鴻。

岸貧

無能事耕獲。亦不有鷄豚。燒蚌噉槎沫。織蓑依樹根。野蘆編作室。青蔓與爲門。稚子將荷葉。還充犢鼻裩。

村豪

日擊收田鼓。時稱大有年。爛傾新釀酒。包載下江船。女髻銀釵滿。童袍毳氎鮮。里胥休借問。不信有官權。

寄酬發運許主客

淮上秋來物意閑。又乘輕舸信帆還。一浮一沒水中鳥。更遠更昏天外山。斜幅纏蹄兵吏至。濃金洒紙領珠頒。欲酬已覺不能敵。盡日臨風思自慙。

淮陰

青環瘦鐵纜。繫在淮陰城。水脛多長短。林枝有直橫。山夔一足走。妖鳥九頭鳴。韓信祠堂古。誰將跨下平。

田家屋上壺

脩蔓屋頭綴。大壺簷外垂。霜乾葉猶苦。風斷根未移。收挂煙突近。開充酒具遲。賤生無所用。會有千金時。

小村

淮闊洲多忽。有村棘籬疎。敗謾爲門。寒雞得食自呼伴。老叟無衣猶抱孫。野艇鳥翹唯斷纜。枯桑水齧只危根。嗟哉生計一如此。謬入王民版籍論。

泊下黃溪

黃溪晚來泊。得見田家微。刺艇斜陽下。耕洲載耒歸。牛鳴向空犢。犬喜入人衣。復有返樵者。檐枯翹雉肥。

聞進士販茶自此宣州。至和二年五月後。

山園茶盛四五月。江南竊販如豺狼。頑凶少壯冒嶺險。夜行作隊如刀槍。浮浪書生亦貪利。史笥經箱爲盜囊。津頭吏卒雖捕獲。官司直惜儒衣裳。卻來城中談孔孟。言語便欲非堯湯。三日夏雨刺昏墊。五日炎熱譏早傷。百端得錢事酒肉。屋裏餓婦無糶糧。一身溝壑乃自取。將相賢科何爾當。

梅雨

三日雨不止。蚯蚓上我堂。濕菌生枯籬。潤氣醜素裳。東池蝦蟆兒。無限相跳梁。野草優花圃。忽與欄干長。門前無車馬。苔色何蒼蒼。屋後昭亭山。又被雲蔽藏。四向不可往。靜坐唯一牀。寂然忘外慮。微誦黃庭章。妻子笑我閑。曷不自舉觴。已勝伯倫婦。一醉猶在傍。

汴渠

我實山野人。不識經濟宜。聞歌汴渠勞。謾綴汴渠詩。汴水源本清。隨分黃河枝。濁流方已盛。清派不可推。天王居大梁。龍舉雲必隨。設無通舟航。百貨當陸馳。人肩牛騾驢。定應無完皮。苟欲東南蘇。要省聚斂爲。兵衛詎能削。乃須雄京師。今來雖太平。盡罷未是時。願循祖宗規。勿益羣息之。譬竭兩川賦。豈由此水施。縱有三峽下。率皆龕冗資。慎莫尤汴渠。非渠取膏脂。

答宣城張主簿遺鴉山茶次其韻

昔觀唐人詩。茶詠鴉山嘉。鴉銜茶子生。遂同山名鴉。重以初槍旗。采之穿煙霞。江南雖盛產。處處無此茶。纖嫩如雀舌。煎烹比露芽。競收青莢焙。不重漉酒紗。顧渚亦頗近。蒙頂來以遐。雙井鷹掇爪。建溪春剝葩。日鑄弄香美。天目猶稻麻。吳人與越人。各各相鬪夸。傳買費金帛。愛貪無夷華。甘苦不一致。精麤還有差。至珍非貴多。爲贈勿言些。如何煩縣僚。忽遺及我家。雪貯雙砂罌。詩琢無玉瑕。文字搜怪奇。難於抱長蛇。明珠滿紙上。剩畜不爲奢。玩久手生胝。窺久眼生花。嘗聞茗消肉。應亦可破瘕。飲啜氣覺清。賞重歎復嗟。歎嗟旣不足。吟誦又豈加。我今實強爲。君莫笑我耶。

依韻和永叔澄心堂紙答劉原甫

退之昔負天下才。掃掩衆說猶除埃。張籍盧同鬪新怪。最稱東野爲奇瑰。當時辭人固不少。漫費紙札磨松煤。歐陽今與韓相似。海水浩浩山嵬嵬。石君蘇君比盧籍。以我待郊嗟困摧。公之此心實扶助。更復有力誰論哉。禁林晚入接俊彥。一出古紙還相哀。曼卿子美人不識。昔嘗吟唱同樽壘。因之作詩答原甫。文字駛穩如刀裁。怪其有紙不寄我。如此出語亦善談。往年公贈兩大軸。于今愛惜不輒開。是時有詩述本末。值公再入居蘭臺。崇文庫書作總目。未暇綴韻酬草萊。前者京師競分買。罄竭舊府歸鄒枚。自慚把筆粗成字。安可遠與鍾王陪。文高墨妙公第一。宜用此紙傳將來。

夢後寄歐陽水叔

不趁常參久。安眠向舊溪。五更千里夢。殘月一城鷄。適往言猶是。浮生理可齊。山王今已貴。肯聽竹禽啼。

送方進士遊廬山

長風沙浪屋許大。羅刹石齒水下排。歷此二險過湓浦。始見瀑布懸蒼崖。繫舟上岸入松徑。三日踏穿新蠟鞋。路盤深谷出嶺望。後山日照前山霾。偶逢風雨恐衣濕。側倚石脅人相乖。雨收不覺在高處。卻見童僕提攜偕。水聲不絕鳥聲好。藥草香氣侵人懷。老僧避俗去足跡。野客就澗開門闥。樹崑隱映見寺刹。層層杳杳躋雲階。塢田將穫鳥雀橫。秋果正熟猴猿齧。東林淡齏應似舊。唯此足以待爾儕。子心洒落徹然往。我方塵垢難磨揩。

穎公遺碧霄峯茗

到山春已晚。何更有新茶。峯頂應多雨。天寒始發芽。採時林狃靜。蒸處石泉嘉。持作衣囊祕。分來五柳家。

黃鶯

內家初上翠微宮。樹裏窺人在半空。笑語漸高無約束。侍臣偷望向雲中。

西鄰少年今出遊。東家女兒未識羞。門前烏白葉已暗。日暮問誰牆上頭。

李仲求寄建溪洪井茶七品云愈少愈佳未知嘗何如耳因條而答之

忽有西山使。始遺七品茶。末品無水暈。六品無沉祖。五品散雲脚。四品浮粟花。三品若瓊乳。二品罕所加。

絕品不可議。甘香焉等差。一日嘗一甌。六腑無昏邪。夜枕不得寐。月樹聞啼鴉。憂來唯覺衰。可驗唯齒牙。動搖有三四。妨咀連左車。髮亦足驚疎。疎疎點霜華。乃思平生游。但恨江路賒。安得一見之。養泉相與誇。

春日拜壠經田家

田家春作日日近。丹杏破額場圃頭。南嶺禽過北嶺叫。高田水入低田流。桑牙將綻霧露裏。蠶子未浴箱篋收。今我還朝固不遠。紫宸已夢瞻珠旒。

重送楊明叔并序

行而有以贖者。助所不足也。車馬子有。裘服子有。貨具子有。所可贈者。詩言爾。故先爲七言以送。將以道彼美而樂乎往也。子不爲重。邀予以規。又作五言應其請。

君將會稽去。舊蹟可以嬉。予因狀其美。贈子臨路岐。子不以爲樂。但願有以規。噫。吾豈無說。畏子未及裨。既求不語子。吾曷忍子欺。前年子渡淮。夜泊洪澤湄。有鬼稱使者。來告風波期。子時再拜謝。乃被鄰船嗤。逡巡鬼復至。復附船家兒。怒彼慢嗤士。明當使驚危。船兒傍舷迴。走若一足夔。翌日各解舟。出浦風動旗。子獨乘安流。彼受橫浪吹。此事非子傳。焉得他人知。昨逢令弟蘊。備述果不疑。越俗素重鬼。慎勿啓其私。子口有仁義。子腹有書詩。子嘗談王道。怪語固未宜。近聞蘇才翁。問子辟者誰。得非外戚侯。子怒已豎眉。今我倘得罪。甘與蘇同之。

過淮

侍親數數來浮汴。護櫬迢迢復渡淮。旨蓄曾無御寒具。細君唯有隱居斂。月痕遠入魚銜浪。潮退長汀蚌閣崖。素服華顛色相似。青銅不忍見形骸。

發長蘆江口

篙師拖工相整衣。龍女廟中來宰豨。野祝擊鼓降神語。老鴉啣肉上樹飛。長江無風平似削。兩櫓夾舸行將歸。南國山川都不改。傷心慈姥舊時磯。

龍女祠祈順風

龍母龍相依。風雲隨所變。舟人請予往。出廟旗腳轉。旗指西南歸。飛帆疾流電。長蘆江口發。平明白鷺洲。前已朝膳。竹根盃玟不欺人。世間然諾空當面。

早發大信口

犬吠知船解。村墟尙閉門。霜泥黏纜尾。冰水閣潮痕。撇撇鷓鴣去。纖纖舴艋昏。梅湖到不遠。寄信向田園。依韻和正仲寄酒因戲之

上字黃封誰可識。偷傳王氏法應真。清淮始變醅猶薄。句水新來味更醇。欲擬比酥酥少色。曾持勸客客何人。紅梅雖是吾家物。老去無心一醉春。

清淮酒。本王九傳法於山陽。

閒居

讀易忘飢倦。東窗盡日開。庭花昏自斂。野蝶晝還來。謾數過籬筍。遙窺隔葉梅。唯愁車馬入。門外起塵埃。

秋雨篇

秋雨一向不解休。連昏接晨終窮秋。梅生不量仰天問。神官夜夢言語周。日月是天之兩目。忽然生翳無藥瘳。只知淚滴爲赤子。赤子豈悟天公憂。天公哭霽霽。洒涕落九州。地祇不敢安。泥濘已沒頭。乃因從容詰神官。后稷今在帝所不。從前后稷知稼穡。曾以筋力親田疇。曷不告帝且輟泣。九穀正熟容其收。蚤時不泣此時泣。憂民欲活反扼喉。神官發怒髭奮虬。下土小臣安預謀。恐然驚覺汗交流。樹上已聽呼雌鳩。聞永叔出守同州寄之

冕旒高拱元元上。左右無非唯唯臣。獨以至公持國法。豈將孤直犯龍鱗。茱萸欲把人留楚。苜蓿方枯馬入秦。訪古尋碑可銷日。秋風原上足麒麟。

送天台李令庭芝

吾聞天台久。未見天台狀。去海知幾里。去天知幾丈。峯嶺隱與出。岳壑背與向。雲雷反在下。泉瀑反在上。幽深無窮窺。杳眇無窮望。至險可悸慄。至怪可駭喪。石橋彎長弓。跨絕絃未放。當時帛道猷。平步入青嶂。去爲六百石。亦見志所尚。子欲廣異聞。可以一尋訪。

十一月十二日賽昭亭神

冷雨凝雪未成雪。潭空魚寒歸石穴。長篙扣穴倩鯉魚。寄信山頭來奠設。魚傳水鳥飛上山。山大槎槎乾吹咽。旋灰起角巫鼓鳴。漆俎銅盤顛牲血。琵琶嘈嘈神降言。福汝祐汝無災孽。西向啐飲東向迴。溪心卻望山崔嵬。

依韻和吳正仲冬至

流光冉冉卽衰遲。物趣迴還似轉規。長景已知今日至。孤懷不比少年時。偶陪上閣鴛鸞後。且與南州父老期。況有春禾新酒熟。百分休放手中卮。

依韻答吳正仲罷飲

君辭予家傾蟻醕。自有嘉味須持來。青蔑絡餅方出戶。紅粧侑席已邀杯。窮愁一飲猶關分。側望羣賢不可陪。靜坐紙窗無所得。只將文字眼前堆。

依韻諸公尋靈濟重臺梅

梅要山傍水次栽。非同弱柳近章臺。重重葉葉花依舊。歲歲年年客又來。雖愛千枝競繁密。還嗟短髮已衰頽。郎官博士留車騎。擁蔽修篁爲斫開。

和正仲再和罷飲

吳味期君強飲開。楚醅因我破愁來。何言合美將虛館。卻憶爭妍就捧杯。夜霰已先庭雪集。單衣難與毳裘陪。踐盟幾欲驅車去。塵事無端日日堆。

和韻三和戲示

簪簪畫蛤瓦缸醅。海若淮壖各寄來。將學時人鬪牛飲。還從上客舞娥杯。蓬蒿自有蔣生樂。珠翠寧容鄭氏陪。莫計寒暄與風雪。古來黃土北邙堆。鄭康成與盧子幹同事馬融融後堂有珠翠之會康成不得預焉

依韻四和正仲

四和還如九醞醅。更醇更美未嫌來。相逢莫作兩般眼。一飲不辭三百杯。嵇阮當時無俗慮。山王雖貴亦能陪。如今世態尤堪薄。只把官資滿眼堆。袁招飲鄭云。自旦至暮。三百餘杯。

依韻和吳正仲聞重梅已開見招

難開密葉不因寒。誰翦鵝兒短羽攢。猶是去年驚目豔。不知從此幾人觀。重重好藥重重惜。日日攀枝日日殘。我爲病衰方止酒。願攜茶具作清歡。

朝

木鑣初開水上城。竹籬深閉日光生。青苔井畔雀兒鬪。烏白樹頭鴉舅鳴。世事但知開口笑。俗情休要着心行。是非不道任挑撻。唯憶當時阮步兵。

東溪

行到東溪看水時。坐臨孤嶼發船遲。野鳧眠岸有閑意。老樹着花無醜枝。短短蒲茸齊似翦。平平沙石淨於篩。情雖不厭住不得。薄暮歸來車馬疲。

送吳正仲婺倅歸梅谿待闕

山水東陽去未去。朋親苕霅朝復朝。更無越相逃名舸。猶看吳王送女潮。海燕歸齊聲滿屋。谿梅開過子生條。明年十月吏迎處。七里灘前棹奏簫。

志來上人寄示醅釀花並壓埽茶有感

京都三月醅釀開。高架交垂自爲洞。素葉層層紫蕊香。釀歸光祿春生甕。東陌西池走鈿車。芳林廣囿飛朱鞮。二年不到大梁城。江邊淚滴肝腸痛。況茲齒髮漸衰老。已是憂愁不如衆。宣城北寺來上人。獨有一叢盤嫩蘘。去歲游吳求不得。今朝還喜自持送。眼底雖同往日看。樽前所憶皆成夢。又置新茶采雨前。烏鶯壓埽雲色弄。對花卻酒煮香泉。強詠才慚非白鳳。

次韻和吳季野題岳上人澄心亭

空山舊逕綠苔滿。古寺齋盂白薤蒸。暑雨坐中飛漠漠。野泉林外落層層。從來勝絕皆離俗。未有幽深不屬僧。唯愛溪頭一尋水。莫聞流浪莫聞澄。

答宣闔司理

六經義趣深。傳訓或得失。後人語雖淺。辨識猶百一。歐陽最知我。初時且尙窒。比以爲橄欖。迴甘始稱逆。老於文學人。尙不卽究悉。宜乎與世士。橫爾遭詬唧。誓將默無言。負暄方抱膝。非非孰是是。都莫答問詰。歲暮宣參軍。辭如鮑昭逸。粲然傾明珠。褒我頗過實。便言楚江萍。光彩侔旭日。自慚流浪蹤。不得蒿芹匹。復爲苦硬句。酬報強把筆。

依韻和丁元珍見寄

我從江南來。挂席江上正。輕舟自行速。不與風力競。乃省少時學。勉強無佳興。初如弄機杼。未解布絲經。利器昧其持。或反授人柄。及親賢豪游。所尙志已定。不厭朝市喧。不須山林靜。不爲煦煦妍。不爲嚴嚴冰。遇物理自暢。區處劇操令。仍類楚野筍。忽從孤根迸。便成翠琅玕。久與風霜硬。雖然達吾真。誰復究畢竟。世間忘坦途。盡欲求密徑。哂我是迂疎。宜乎今蹭蹬。蹭蹬誠可嗟。所偶亦已併。晚逢二三友。喜飲恨多病。道路何遭迴。季秋越春孟。平生景慕者。邂逅出天幸。接跡猶謂榮。況此聲顏並。實慚寡時用。又顧無奇行。愛之不忍去。自旦還至暝。在昔濁世賢。徒知清酒聖。但用醉爲娛。一老少不更。稍思桃源人。翩爾乘漁艇。尋花逐水往。豈念衰與盛。歌謳非俗情。山響自答應。以此謝君勤。微言期略聽。衰衰不足爲。試共幽人評。

泰州王學士寄車螯蛤蜊

車螯與月蛤。寄自海陵郡。謂我抱餘醒。江都多美醞。老來飲不滿。一醉已關分。甘鮮雖所嗜。易飫亦莫問。嬌女巧收殼。燕脂合眉暈。貧奩無金玉。狼藉生悲忿。妻孥喜食之。婢妾困掃拚。行當至京華。耳目飽塵盆。此味爽口難。書爲厭者訓。

依韻和孫都官河上寫望

河上風煙愛此邦。吳艘越舸不相降。魚鯉蠹蠹橋邊市。花暗深深竹裏窗。蹴踘漸知寒食近。鞦韆將立小囊雙。年光取次須偷賞。何用功名節與幢。

依韻和許待制偶書

曉雨射船珠瀉盤。平明水上舞英殘。鬪雞蹠惡輕泥濕。調馬啼翻軟土乾。深屋燕巢將欲補。密房蠶蟻尙憂寒。爲言楚客甘蔬菽。白芷香牙長嫩珊。

依韻和春日偶書

甕面春醅壓嫩藍。盤中鵝炙亦肥甘。正宜醉夢輕爲蝶。苦怕酬詩密似蠶。病起羊公方隱几。歸來陶令只乘籃。河堤古木欣欣暗。野水新秧拍拍滄。已向官資隨分足。莫將忠憤等閑談。况於世上諸般厭。不作人間一例貪。陋巷自知當退縮。權門誰解更趨參。高低趣向難爲合。冷暖情懷固飽諳。勉意妻兒猶苟祿。強顏冠冕未抽簪。唯公恩遇留連召。頻對樽壘也負慚。

依韻和禁煙近事之什

狂風暴雨已頻過。近水棠梨着未多。窈窕踏歌相把袂。輕浮賭勝各飛墻。閑牽白日游絲颺。細慕黃金舞帶拖。小苑芳菲彙花鬪。華堂嘲燕嘶爭窠。西州駿馬頭如剝。南國佳人頸似瑳。結客追隨傾畫榼。分朋游樂藉青莎。鞦韆競打遺鈿翠。芍藥將開翦纈羅。我病乞求新火炙。無心更聽竹枝歌。

觀邵不疑學士所藏名書古畫

野性好書畫。無力能自致。每遇高趣人。常許出以視。邵侯多奇玩。留我特開筭。首觀阮與杜。驢上瞑目醉。阮籍。韓幹貌四馬。臨流解鞍轡。花驄照夜白。正側各畜意。繫衣穿袴靴。坐立皆廐吏。精神宛如生。于腮復穿鼻。梅雞徐熙花。竹間寒雀睡。逸少自寫真。對鏡絕相類。數本失姓名。古胡并老驥。山水樹石硬。荆關藝能至。荆浩。巨然李成者。落筆愈奇異。人物張僧繇。雖傳恐非是。其餘又莫究。摸搭似未備。周秦以來書。行草楷篆隸。聲名舊烜赫。一一果可喜。邵侯愛我曹。咸使紙尾記。况侯有古學。小字刻珉翠。各贈墨本歸。懷寶誰肯忌。

將赴表臣會呈杜挺之

莫怪去遲遲。予心君亦知。膝前嬌小女。眼底寧馨兒。學語渠渠問。牽裳步步隨。出門雖不遠。情愛未能移。高車再過謝永叔內翰

世人重貴不重舊。重舊今在歐陽公。昨朝喜我都門入。高車臨岸進船篷。俯躬拜我禮愈下。騶徒竊語音微通。我公聲名壓朝右。何厚於此瘦老翁。笑言啞啞似平昔。妻子信說如梁鴻。自茲連雨泥沒脛。未得謁帝明光宮。冒陰履濕就稅地。親賓未過知巷窮。復聞傳呼公又至。黃金絡馬聲瓏瓏。紫袍寶帶照屋室。飲水啜茗當清風。邀以新詩出古律。霜髯屢領搖寒松。因嗟近代貴莫比。官爲司空仍侍中。今成家丘已寂寞。文字豈得留無窮。以此易彼可勿媿。浮榮有若送雨虹。須臾斷滅不復見。唯有明月常當空。况我學不爲買祿。直欲到死攀軻雄。一飯足以飽我腹。一衣足以飾我躬。老雖得職不足顯。願與公去驩樂同。驩樂同。治園田。穎水東。

李審言相招與刁景純周仲章裴如晦馮當世沈文通謝師厚師直會開寶塔院

自君命我飲。朝暮雨傾瓦。城東與城北。大道泥沒馬。敢忘主人勤。顛撲困馭者。衆客亦如期。陳肴藉蘭若。馮裴與沈謝。辯論過終賈。刁周事老成。危坐言語寡。酒半時謔劇。揣狀類模寫。或譏項髮禿。或指舌端傻。或將冠帶身。勸作梁武捨。謂我大耳兒。此實已見假。又效井市態。屈強體非雅。順風手沙沙。逆風口哆哆。竟席屢絕倒。去忌肝膽瀉。規規豈無儕。達識高天下。

陸子履見過

劉郎謫去十年歸。長樂鐘聲下太微。屈指故人無曩日。平明騎馬扣吾扉。論情論舊彈冠少。多病多愁飲

酒稀猶喜醉翁時。一見攀炎附熱莫相譏。

重送周都官

水上朱樓畫角鳴。濛濛雨裏榜舟輕。未逢甫里先生謁。多見吳興太守迎。荷葉半黃蓮子老。霜苞微綠橘林明。十年不到風烟改。君去將詩與畫評。

送李載之殿丞赴海州推務

瓜蔓水生風雨多。吳船發棹唱吳歌。槎從秋漢下應快。人憶故園歸奈何。世事靜思同轉轂。物華催老劇飛梭。茶官到有清閑味。海月團團入酒罍。

和吳冲卿學士石屏

吳夫子。佩銀龜。乘天馬。素怪奇。忽得號略一片石。其中白色圓如規。又有樹與鳥。畫手雖妙何能爲。吳乃持問歐陽公。比公曩獲尤可疑。疑不爲辨賦以詩。詩辭粲粲明星垂。復遣賈來使我和。坐上鉅公傍睨之。范侯實有楊雄學。咸云此理難究推。我歸滌慮反覆思。義雖不經聊解頤。月與太陽合朔時。陽鳥飛上桂樹枝。枝上作窠生羣兒。人不知天公。天公欲俾世間見。影着石面如粘竊。烏旣不得去。月亦不可移。留爲千古作好玩。慎勿傾樸同玉碑。

時在唐書局。與歐陽永叔。范景仁會食。得所示詩。王元

送薛氏婦歸絳州

在家勗爾勤。女功無不喜。既嫁訓爾恭。恭己乃遠恥。我家本素風。百事無有侈。隨宜具奩箱。不陋復不鄙。當須記母言。夜寐仍夙起。慎勿窺窗戶。慎勿輒笑毀。安非勿較竟。醜語勿辨理。每順舅姑心。况逆舅姑耳。爲婦若此能。乃是儒家子。看爾十九年。門閭未嘗履。一朝陟太行。悲傷黃河水。車徒望何處。哭泣動隣里。生女不如男。天親反由彼。

永叔請賦車螯

素唇紫錦背。漿味壓蚶菜。海客穿海沙。拾貯寒潮退。王都有美醞。此物實當對。相去三千里。貴力致以配。翰林文章宗。炙鮮尤所愛。旋坼旋沽飲。酒船如落埭。殊非北人宜。肥羊噉巒塊。

歐陽永叔王原叔二翰林韓子華吳長文二舍人同過弊廬值出不及見十二月七日

枯竹爲門扉。不可容車騎。况如鄭廣文。無氈藉賓位。窮冬月破七。貴客聯玉轡。傳驕肅里閭。下榻呼童稚。問我何所往。共留牆上字。兒愚不知誰。金章言照地。既屈卿大夫。恨莫親帚箒。星躔回已高。麟趾寧復至。戢戢鄰巷居。相見竊自喟。豈料瘦老翁。能令賢達至。昔時蓬蒿徑。安有此盛事。

還吳長文舍人詩卷

松液化茯苓。又因爲琥珀。遇物必得形。毛髮曾不隔。君子亦豹變。其文蔚可覲。今者逢吳侯。滿腹貯經籍。噴吐五色霓。自堪垂典冊。詩教始二南。皆著賢聖跡。後世竟翦裁。破碎隨刀尺。我輩強追倣。畫龍成蜥蜴。

有唐文最盛。韓伏甫與白。甫白無不包。甄陶咸所索。侯初守二郡。山永多助益。升高觴嘉賓。賦筆速鷹翻。蒼書成大軸。許我觀琮璧。真物固易辨。恨無百金易。借從懷袖歸。誦玩廢朝夕。譬如游國都。懔怍失阡陌。苦吟三十年。所獲唯巾幘。豈比夸受降。甲齊熊耳積。重見元和風。珠玉敵海舶。自慙寒餓爲。何張空避席。

莫登樓

莫登樓。腳力雖健勞雙眸。下見紛紛馬與牛。馬矜鞍轡牛服輻。露臺歌吹聲不休。腰鼓百面紅臂構。先打六么後梁州。棚簾夾道多天柔。鮮衣壯僕擗髭虬。寶搗呵叱倚王侯。夸妍鬪豔目已偷。天寒酒醺誰爾俛。倚檻心往形獨留。有此光景無能游。粉署深沉空翠幃。青綾被冷風颼颼。懷抱旣如此。何須望樓頭。

依韻和永叔勸飲酒莫吟詩雜言

我生無所嗜。唯嗜酒與詩。一日舍此心腸悲。名存貴大不輒思。甌空釜冷不俛眉。妻孥凍餓數悲之。但自吟醉與世遠。此外萬事皆莫知。王公謁請衆去早。旣衰愈懶身到遲。日高倦僕顏色沮。况騎瘦馬兩耳垂。厭此勞苦不喜出。唯有文字時能爲。諸公尙恐竭智慮。勤勤勸飲莫我卑。再拜受公言。竊意公矯時。只愛詩。謂余癡。

出省有日書事和永叔

辭家綵勝人爲日。歸路梨花雨合晴。庭下鞦韆應未拆。籠中鸚鵡卽聞聲。千門走馬將看傍。廣市吹簫尙

賣餠已是瓊林芳卉晚。不須游處避門生。

上馬和公儀

煙火千門曉欲開。五花驕馬肯徘徊。井閭已是經時隔。親舊全如遠別來。帝闕重看多氣象。天街新霽少塵埃。振冠浣服無容久。便見池門放榜催。

和楚屯田同曾子固陸子履觀予堂前石榴花

堂下一匹鄭虔馬。欄邊兩株安石榴。但能有酒邀佳客。亦任狂花落素甌。俗女紅裙無好色。主人白髮自侵頭。欲歌翠樹芳條曲。已去洛陽三十秋。

呂晉叔著作遺新茶

四葉及王游。共家原坂嶺。歲摘建溪春。爭先取晴景。大窠有壯液。所發必奇穎。一朝團焙成。價與黃金逞。呂侯得鄉人。分贈我已幸。其贈幾何多。六色十五餅。每餅包青蕪。紅籤纏素繚。屑之雲雪輕。啜已神魄醒。會待嘉客來。侑談當晝永。

送畢甥之臨邛主簿雜言

自我歷官三十年。有腳未曾行蜀川。李白嘗言道之艱險。長嗟難劇上青天。烏悲猿嚎馬蹄脫。苔梯雨棧愁傾顛。蒼崖下窺不見底。但聽雷聲輓石懸湍濺。曉盤青泥上高煙。暮盤青泥到下泉。劍閣如劍。巉然割

腸刺眼今古連。爾去三千九百里。巴山小馬烏皮韉。一婦一奚行李單。家具日貨能幾錢。人皆畏避不敢往。此獨敢往何所便。况是初宦無遠適。心意自許非由銓。異乎哉。我今送爾徒哀憐。

送王介甫知毗陵

吳牛常畏熱。吳田常畏枯。有樹不蔭犢。有水不滋糝。孰知事春農。但知急秋租。太守追縣官。堂上怒奮鬚。縣官促里長。堂下鞭朴俱。不體天子仁。不恤黔首逋。借問彼爲政。一一何所殊。今君請郡去。預喜民將蘇。每觀二千石。結束辭國都。絲韉加錦緣。銀勒以金塗。兵吏擁後隊。劍撾盛前驅。君又不若此。革轡障泥烏。款行問風俗。低意騎更驚。下情靡不達。略細舉其麤。會宜爲衆異。亦罔爲世趨。學詩聞已孰。愛棠理豈無。

永叔內翰遺李太博家新生鴨腳

北人見鴨腳。南人見胡桃。識內不識外。疑若橡栗韜。鴨腳類綠李。其名因葉高。吾鄉宣城郡。每以此爲勞。種樹三十年。結子防山獠。剝核手無膚。持置官省曹。今喜生都下。薦酒壓葡萄。初聞帝苑夸。又復主第褒。纍纍誰採掇。玉椀上金鼈。金鼈文章宗。分贈我已叨。豈無異鄉感。感此微物遭。一世走塵土。鬢顛得霜毛。

陸子履示秦篆寶

其文曰。二十六年。皇帝盡并兼。天下諸侯。黔首大安。號爲皇帝。乃詔丞相斯。館法度量則。不一嫌疑者。皆明一之。

秦旣并諸侯。斯乃一度量。鑄寶以永傳。萬世俾勿喪。精銅不生花。小篆著丞相。一沒咸陽宮。千秋事更王。陸君居洛城。客有來渭上。曰因農人耕。發壞破古藏。遂獲此物還。文完字何壯。始號爲皇帝。立語已超曠。

意將愚黔首。疊起危博浪。其後同玉璽。不隨驪山葬。今蓄於君家。徒爾資奇尙。物以用爲珍。異時皆似妄。
聽文都知吹簫晏。虞部遣求一見之。

虞舜已去蒼梧野。秦女驂鸞無復下。簫管人間不解傳。帝樂部中能亦寡。欲買小鬟試教之。教坊供奉誰知者。晏識文公始致來。勸接賤生宜強且。乃呼側坐吹一曲。驚顧頓嘶堂下馬。吾妻閨中聞不聞。稚女扳簾笑嬌姸。未敢多聽便遣還。贈飲單盃向身瀉。

依韻和永叔久在病告近方赴直道懷見寄二章

浴堂深殿近皇居。秋夕詞臣直宿初。宮女穿針爭落月。官奴持燭看殘書。萬家乞巧心無盡。斜漢飛光望有餘。枕上江山夢猶熟。五更寒雨過簾疎。

玉轡瓏瓏出絳宮。青槐馳道曉煙中。塵頭尙裊洗車雨。馬耳前趨吹鬣風。聞說自將身許國。不須仍以醉爲公。我今才薄都無用。六十棲棲未歎窮。

哭孫明復殿丞

自古春秋學。皆知不可過。生前恩禮少。歿後薦章多。妻子將焉託。田園有幾何。汝陽秋樹裏。黃鳥謾聽歌。
依韻和永叔秋日東城郊行

郊原物老莽然中。寓興驅車向國東。夾道名園迷屈曲。壓枝秋實亂青紅。寒畦覆綠將收菜。野蝶雙飛尙

繞叢田父欣來問行幸。依稀還似鬪鷄翁。

和楊直講夾竹花圖

桃花天紅竹淨綠。春風相間連溪谷。花留蜂蝶竹有禽。三月江南看不足。徐熙下筆能逼真。璽素畫成纔六幅。萼繁葉密有向背。枝瘦節疎有直曲。年深粉剝見墨蹤。描寫工夫始驚俗。從初李氏國破亡。圖書散入公侯族。公侯三世多衰微。竊買檐頭由婢僕。太學楊君固甚貧。直緣識別爭來鬻。朝質綈袍暮質琴。不憂明日鐺無粥。裝成如得驪頤珠。誰能更問龍牙軸。竹真似竹桃似桃。不待生春長在目。

觀韓玉汝胡人貢奉圖

時世重古不重新。破圖誰畫舊胡人。臂鷹捧盤犀利水。鐵鎖獅子同麒麟。翹翹雉尾插頭上。深目鉅鼻青搭巾。塗朱點綠筆畫大。筋骨怒露蠻祠神。茜袍白馬韓公子。從何得此來祕珍。定應海客遠爲贈。中國未覩難擬倫。公子自言吳生筆。吳筆精勁瘦且勻。我恐非是不敢贊。退歸書此任從噴。

依韻和永叔戲作

琵琶轉撥聲繁促。學作饑禽啄寒木。木蠹生蟲細穴深。長啄敲鏗未充腹。攜弦疊響入衆耳。發自深林答空谷。上弦急逼下弦清。正如螳螂捕蟬聲。坐中賓歡呼酒飲。門外客疑將欲行。主人語客客莫去。彈到古樹裂丁丁。內賓外客曾未聽。乍聞此曲無不驚。還憶昭君入胡虜。烏孫帳下邊馬鳴。安知如今有樂事。能

使女奚飛玉觥。女奚年小殊流俗。十月單衣體生粟。言事關西楊廣文。廣文空腹貪教曲。曲奇譜新偷法部。妙在取音時轉軸。翰林先生多所知。又笑畫圖收滿屋。不肯那錢買珠翠。任從堆插塔前菊。功曹時借乃許出。他日求觀龜殼縮。我嗟老鈍不如渠。幸得交朋時借娛。但樂休計有與無。

得王介甫常州書

斜封一幅竹膜紙。上有文字十七行。字如瘦棘攢黑刺。文如溫玉爛虹光。別時春風吹榆筴。及此已變兼葭霜。道途與弟奉親樂。後各失子懷悲傷。到郡紛然因事物。舊守數易承蔽藏。搜姦證繆若治絮。蚤虱盡去煩爨湯。事成條舉作書尺。不肯勞人魚腹將。魚沉魚浮任所適。偶能及我爲非常。勤勤問我詩小傳。國風纔畢葛屨章。昔時許我到聖處。且避俗子多形相。未卽寄去慎勿怪。他時不惜傾箱囊。知君亦欲此從事。君智自可施廟堂。何故區區守黃卷。蠹魚尙恥親芸香。我今正值鷹南翔。報書與君倒肺腸。直須趁此筋力強。炊粳烹鱸加桂薑。洞庭綠橘包甘漿。舊楚黃橙綿作瓢。東山故游攜舞娘。不飲學舉黃金觴。谿如罨畫水。泱泱刺船靜。入白鷺。傍菱葉已枯。鏡面涼。月色飛上白石牀。坐看魚躍散星芒。左右寂寂夜何長。烏棲古曲傳吳玉。千年萬年歌未央。莫作腐儒針膏肓。莫作健吏繩餓狼。儻如鬻遂勸農桑。儻如黃霸致鳳皇。來不來。亦莫愛嘉祥。

得雷太簡自製蒙頂茶

陸羽舊茶經。一意重蒙頂。比來唯建溪。團片敵湯餅。顧渚及陽羨。又復下越茗。近來江國人。鷹爪夸雙井。凡今天下品。非此不覽省。蜀薺久無味。聲名謾馳騁。因雷與改造。帶露摘芽穎。自煮至揉焙。入碾只俄頃。湯嫩乳花浮。香新舌甘永。初分翰林公。豈數博士冷。醉來不知惜。悔許已向醒。重思朋友義。果決在勇猛。倏然乃以贈。蠟囊收細梗。吁嗟茗與鞭。二物誠不幸。我貧事事無。得之似贅瘳。

江鄰幾暫來相見去後戲寄

低頭拜我蒼髯翁。來如飛鳥去如風。一夕共飲斗柄北。平明已向函關東。衆中舊騎跛鼈馬。塞下新買連錢驄。疾驅似逐鄧林日。不肯暫住行何窮。

和韓欽聖學士襄陽聞喜亭

亭欄下望漢江水。淨綠無風寫鏡明。日脚穿雲射洲影。槎頭擺子出潭聲。檣帆落處遠鄉思。砧杵動時歸客情。使者徘徊有佳興。高吟不減謝宣城。

覽顯忠上人詩

昔讀遠公傳。頗聞高行僧。廬山將欲雪。瀑布結成冰。尋蹟數百載。歷危千萬層。師來笑賈島。只解詠嘉陵。

依韻和永叔嘗新茶雜言

自從陸羽生人間。人間相學事春茶。當時採摘未甚盛。或有高士燒竹煮泉爲世誇。入山乘露掇嫩觜。林

下不畏虎與虵。近年建安所出勝。天下貴賤求呀呀。東溪北苑供御餘。王家葉家長白芽。造成小餅若帶鏐。鬪浮鬪色頂夷華。味久迴甘竟日在。不比苦硬令舌窞。此等莫與北俗道。只解白土和脂麻。歐陽翰林最別識。品第高下無畝斜。清明開軒碾雪未。衆客共賞皆稱嘉。建安太守置書角。青翦包封來海涯。清明纔過已到此。正見洛陽人寄花。兔毛紫盞自相稱。清泉不必求蝦蟆。石餅煎湯銀梗打。粟粒鋪面人驚嗟。詩腸久饑不禁力。一啜入腹嗚呼哇。

次韻再和

建溪茗株成大樹。頗殊楚越所種茶。先春喊山摺白萼。亦異烏觜蜀客誇。烹新鬪硬要咬齧。不同飲酒爭畫虵。從揉至碾用盡力。只取勝負相笑呀。誰傳雙井與日鑄。終是品格稱草芽。歐陽翰林百事得精妙。官職況已登清華。昔得隴西大銅碾。碾多歲久深且窞。昨日寄來新巒片。包以籐蔴纏以麻。唯能賸啜任腹冷。幸免酪酲冠弁斜。人言飲多頭顛挑。自欲清醒氣味嘉。此病雖得優醉者。醉來顛踣禍莫涯。不願清風生兩腋。但願對竹兼對花。還思退之在南方。嘗說稍稍能啗蟆。古之賢人尙若此。我今貧陋休相嗟。公不遺舊許頻往。何必絲管喧咬哇。

送葛都官南歸

不羨新爲赤縣尹。惟羨暫向江南歸。江南羃羃梅雨時。風帆差差並鳥飛。罾竿夾岸長若桅。水籠畜魚鮮

且肥。家在千山古溪上。先應喜鵲噪門扉。

永叔內翰見索謝公游嵩書感歎希深師魯子聰幾道皆爲異物。獨公與余二人在。因作五言以敘之。

昔在洛陽時。共游銅駝陌。尋花不見人。前代公侯宅。深堂鏤塵埃。空壁鬪蜥蜴。楸陰布苔綠。野蔓纏石碧。池魚有偷釣。林鳥有巧射。園隸見我來。朱門暫開關。園婦見我還。便掃車馬跡。何以掃馬跡。實亦畏他客。我輩唯適情。一葉未嘗摘。他人或所至。生菓不得惜。又憶游嵩山。勝趣無不索。各具一壺酒。各蠟一雙屐。登危相扶牽。遇平相笑噓。石搗雲衣輕。巖裂天窗窄。上飲醒心泉。高巔溜寒液。下看峯半雨。廣甸飛甘澤。夜宿岳頂寺。明月入戶白。分吟露氣冷。猛酌面易赤。明朝循歸途。兩脛痛若刺。日旰就馬乘。香草路迫阨。卻望峻極居。已與天外隔。薄暮投少林。漱濯整冠幘。碑觀巡幸僧。指古定空壁。誓將新詠章。燈前互詆擿。楊生護己短。一字不肯易。明年移河陽。簿書日堆積。忽得謝公書。大夸遊覽劇。自嵩歷石堂。蘚花題洞額。其文曰神清。固非人筆畫。乃知二公貴。逆告意可贖。遂由龍門歸。里堠環數驛。我時詩已答。或歌或辨責。責我不喜僧。性實未所獲。凡今三十年。壘塚拱松柏。唯公與非才。同在不同昔。昔日同少壯。今且異肥瘠。昔日同微祿。今且異烜赫。昔同騎破韉。今控銀轡革。昔同自謳歌。今執樂指百。死者誠可悲。存者獨窮厄。但比死者優。貧存何所益。

次韻和吳仲庶舍人送德化郭尉

蒲葉高帆十二幅。秋風逆水滿檣開。是時不畏浪頭起。到日定將船尾堆。用舍東方言虎鼠。賤疎梅福比蒿萊。少年才辨無如美。廬岳峯前莫滯迴。

和韻答永叔洗兒歌

夜夢有人衣帔蜺。水邊授我黃龜兒。生男前一夕。夢道士贈龜一枚。仰看星宿正離離。玉魁東指生斗威。明朝我婦忽在蓐。乃生男子實秀眉。自磨丹砂調白蜜。辟惡辟邪無寶犀。我慙暮年又舉息。不可不令朋友知。開封大尹憐最厚。持酒作歌來慶之。畫盆香水洗且喜。老駒未必能千里。盧仝一生常困窮。亦有添丁是其子。

送余少卿知睦州

青山峽裏桐廬郡。七里灘頭太守船。雲霧未開藏宿鳥。坡原將近見燒田。養茶摘葉新春後。種橘收包小雪前。民事蕭條官政簡。家書時問霽溪邊。

田家

草木遶籬盛。田園向郭斜。去鋤南山豆。歸灌東園瓜。白水照茅屋。清風生稻花。前陂日已晚。聒聒競鳴蛙。

歐陽寺丞桐城宰

葉落淮南樹。青山徧馬頭。人煙將近郭。松竹不知秋。夜虎林間嘯。溪泉舍下流。門前仲卿廟。遺跡待君求。

朱邑冢祠
在焉。

餘姚陳寺丞

試邑來勾越。風煙復上游。江潮自迎客。山月亦隨舟。海貨通閩市。漁歌入縣樓。絃琴無外事。坐見浦帆收。

任適尉烏程

俛作程鄉尉。折腰還自甘。卞峯晴照黛。霽永曉澄藍。葑上春田闢。蘆中走吏參。到時蘋葉長。柳暉蓋江南。

夏日晚霽與崔子登周襄故城

雨脚收不盡。斜陽半古城。獨攜幽客步。閒閱老農耕。寶氣無人發。陰蟲入夜鳴。余非避喧者。坐愛遠風清。

西湖閑望

夏景已多趣。湖邊日更佳。園葵雜紅紫。岸柳自欹斜。雨氣收林表。城陰接永涯。愛閒輸白鳥。盡日立汀沙。

金山寺并序

昔嘗聞謝紫微言。金山之勝。峯巒攢永上。秀拔殊衆山。環以臺殿。高下隨勢。向使善工摸畫。不能盡其美。初恨未遊。赴官吳興。舩次瓜洲。值海汐冬落。孤港未通。獨行江際。始見故所聞金山者。與謝公之說無異也。因借小舟以往。乃陟迴閣上。上方歷絕頂。以問山阿。危亭曲軒。窮極山永之趣。一草一木。雖未蓂發。而或青或凋。皆森植可愛。東小峯謂之鶴山。有海鶴雄雌棲其上。每歲生雛。羽翮既成。與之縱飛。

迷而後返。有年矣。惡禽猛鷲不敢來茲。以搏魚鳥。其亦不取近山之物以爲食。可義也夫。薄暮返舟。寺僧乞詩。強爲之句。以應其請。偶然而來。不得髣髴。敢與前賢名跡耶。

吳客獨來後。楚橈歸夕曛。山形無地接。寺界與波分。巢鶴寧窺物。馴鷗應作羣。老僧忘歲月。石上看江雲。

舟中值雨裴刁二君相與見過

江上滄淒淒。天形接野低。岸痕生舊水。馬跡踏春泥。風急侵衣重。山昏卷幔迷。誰驚二客論。不愧巨源妻。

題刁經臣山居時已應辟西幙

向不樂郡府。遂去歸田園。結廬復種菽。草樹日已繁。散帙理舊學。了然無俗喧。春雨一迴過。覽耕登古原。青山每自愛。霽色當衡門。故人苟來往。名宦未嘗言。趣適已不淺。道心良亦存。忽聞辟書至。便令驅犢轅。豈期始匏瓜。長繫蒿萊根。始知古君子。出處惟義敦。

依韻和武平九月十五日夜北樓望太湖

東吳臨海若。看月上青冥。河漢微分練。星辰淡布螢。細煙沉遠水。重露竄空庭。孤坐饒清興。惟將影對形。

寄西京通判宋次道學士

當時交友都無幾。欲問歡娛亦異今。花接上林新木變。水分清洛舊池深。嵯峨嵩色雲常在。窈窕宮牆草又侵。脩竹千竿白家寺。昔年題處可能尋。

送余中舍知漢州德陽

匹馬易爲秣。單車長是輕。秋風來棧道。宿雨度關城。石上樹林暗。山根江水明。桐花鳳何似。歸日爲將行。

郭之美忽至云往河北謁歐陽永叔沈子山

春風無行跡。似與草木期。高低新萌芽。閉戶我未知。忽聞人扣門。手把蟠桃枝。問我此蟠桃。緣何結子遲。但笑不復答。問者當自推。振衣向河朔。河朔人偉期。以茲不答意。遲子北歸時。

樞澗晝夢

誰謂死無知。每出輒來夢。豈其憂在途。似亦會相送。初看不異昔。及寤始悲痛。人間轉面非。清魂歿猶共。

靈樹鋪夕夢

晝夢同坐偶。夕夢立我左。自置五色絲。色透縑囊過。意在留補綴。恐衣或綻破。歿仍憂我身。使存心得墮。

夕發陽翟

我行陽翟道。暮雨原上急。麒麟冢相望。霹靂碑下立。農耕傍山去。鬼火迸林入。莫問泉下人。馬墮衣更濕。

缺月

缺月來照屋角時。西家狗吠東家疑。夜深精靈鬼物動。僊宰古莽無風吹。

會勝院沃洲亭

前溪來洲後溪闊。風吹細浪龍鱗活。孤亭一人野氣深。松上藤蘿籬上葛。葛花葛蔓無斷時。女蘿莫翦連古枝。當年吾叔讀書處。夜夜濕螢來復去。

題松林院

靜邃無塵地。青燐續焰燈。木魚傳飯鼓。山衲見歸僧。野色寒多霧。溪痕夜閣冰。吾非謝康樂。獨往亦何能。

讀月石屏詩

余觀二人作詩論月石。月在天上。石在山下。安得石上有月蹟。至矣歐陽公。知不可詰不竟述。欲使來者默自釋。蘇子苦豪邁。何用強引犀角蚌蛤巧。辨析犀蛤動活有情想。石無情想已非的。吾謂此石之蹟。雖似月。不能行天成紀曆。曾無纖毫光。不若燈照夕。徒爲頑璞一片圓。溫潤又不似圭璧。乃有桂樹獨扶疎。常娥玉兔了莫覓。無此等物豈可靈。祇以爲屏安足惜。吾嗟才薄不復詠。略評二詩庶有益。

齊國大長公主挽詞

賢行聞當世。尊隆異故常。每令夫結友。不爲子求郎。夜月初沉海。姑星忽隕潢。臨門親祖祭。悲吹起修岡。

重過瓜步山

魏武敗忘歸。孤軍處山頂。雖憐江上浦。鑿巖山巔井。豈是欲勞兵。防患在萌穎。我昔常登臨。徘徊愛晴景。片雨西北來。風雷變俄頃。疾行下危磴。屢脫不及整。霑濡入舟中。幼子喜抱頸。問我適何之。衣溼不太冷。

昨暮泊其陽。月黑夜正永。鴈從沙際鳴。旅回自耿耿。平明夾櫓去。廟樹聳寒嶺。舉首生白雲。飄搖水中影。

秋日村行

谿霧晝又收。山村夜初晦。飢禽來往飛。遠樹青紅碎。原上楚牛童。屋頭吳婦碓。雞肥酒已熟。野老邀同輩。

暝

杳杳鐘初發。昏昏戶閉時。巢禽投樹盡。疲馬入城遲。醉唱眠茅屋。燒光透槿籬。荷鋤休帶月。亭長豎毛眉。

直宿廣文舍下

前夜宿廣文。葉響竹打雪。昨夜宿廣文。窗影竹照月。賴此數竿竹。與我爲煖熱。上有寒鵲棲。拳足如瘦蕨。平明欲飛去。喑喑若告說。我無喜可報。煩爾弄鶯舌。亦嘗苦老鷄。鳴噪每切切。爲學本爲道。窮蹙令素髮。但能得酒飲。終日自兀兀。

送唐紫微知蘇臺

洞庭五月水生寒。盧橘楊梅已滿盤。秦伯廟前看走馬。闔閭城下見驂鸞。吳娃結束迎新守。府吏趨鏘拜上官。曾過揚州能慣否。劉郎盞底勸須寬。

送鮮于祕丞倅通判黔州

壺頭山下俗。巴婦曲中聽。汲井熬鹽白。燒田種穀青。巖風來虎嘯。江雨過龍腥。事簡能談者。楊雄所草經。

武溪詩鈔

余靖字安道。韶州合江人。舉進士。與尹師魯同應拔萃科。靖爲冠。累官至祕書丞。充集賢校理。天章閣待制。時范仲淹以言事觸宰相得罪。靖疏救之。坐貶監筠州酒稅。已仲淹得白。乃召還。慶曆中。夏元昊納誓請和。將加册封。而契丹兵來。止毋與。朝議患之。靖謂撓我爾不可聽。乃假靖諫議大夫。報契丹於九十九泉。卒屈其議。取其要領而還。加知制誥。史館脩撰。時相忌之。坐習蕃語。出知吉州。奪官。皇祐初復起。平儂智高於嶺南。拜集賢學士。遷吏部侍郎。交趾寇邕州。以爲廣西體量安撫使。靖往移檄而定。拜工部尙書。始興郡開國公。食邑二千八百戶。實封二百戶。代還。道病卒。累贈少師。諡曰襄。有武溪集二十卷。爲文不爲曼辭。如辯諡論史序潮等篇。皆有所發明。詩亦堅鍊有法。時歐陽變體復古。靖與交厚。故亦棄華取質。爲有本之學。

送陳京廷評

曲江居嶺阨。楚越封壘間。去異時置冶官。歲入不盈萬。將漕擇材能。招徠委成算。扇囊大野烘。鑿礦重崖斷。閩吳荆廣人。奔走通昏旦。千夫卽山鑄。畢給未酬半。三監居江湄。僦輦日充羨。地官奏計最。遂爲天下冠。嘗聞卜大夫。名聲傳史漢。素履聘脩程。逸足何由絆。

夏日江行

解組趨宸闕。扁舟泛江練。健鷁鴈齊鳴。輕帆雲一片。水闊煙難收。雨昏風易轉。曲浦逗留多。脩程夢魂倦。舟子怯風波。終朝股交戰。預憂雷電驚。先喜虹蜺斷。安知農夫望。只願行人便。愚儒有所思。自愧心如面。追惟亡異才。承恩得爲縣。盤錯非所長。耕桑當勉勸。十日愆一雨。灾恐延農畔。靡愛幣與牲。羣望走之徧。山川未應誠。兼晨不敢飯。霈然得嘉澍。荷天知免譴。何以迅流間。遽逐庸夫變。江淮民薦饑。糟糠未充膳。粢盛苟無害。豈將風雨怨。玉燭長均調。寸進眞君願。

過大孤山

有形天地分。設險山河壯。孤山鎮南服。蛾峨楚之望。中立亡所倚。屹然怪其狀。石巒入春空。翠柱檣秋浪。片時起雪痕。萬頃排霜杖。噫氣專吸呼。橫流以溟漲。行人多躁進。那解明得喪。不顧風濤險。半就江魚葬。掛席經典旁。往往乞靈貺。遂因孤獨名。塑立輕盈像。綽約姑射姿。夢魂巫峽想。如何方面祠。終古承其安。五岳視三公。降殺不過兩。不然爲子男。何以通祀享。四氣均分風。條融各有掌。避其狂怒勢。亦可利攸往。亭育天地心。憑險恣沆漭。正直鬼神德。非名奚獨饗。不使悔吝侵。庶幾忠信仗。在人不在神。勿爲虛稽顙。

寄題田待制廣州西園

善政偏脩舉。增完池館清。地含春氣早。月映暮潮生。石有羣星象。庭際羅立。名九曜石。花多外國名。異花皆舶上所來。

嶺北無與民同雉。兔邀客醉蓬瀛。翰墨資吟興。雲泉適野情。鎮應持左蟹。快欲餽長鯨。積鶴藏樓閣。馴鷗識旆旌。甘棠留美蔭。高倚越王城。

寄題廣州田諫議頤堂

退食公堂暇。應無俗慮侵。簾開雙燕影。吏散百花陰。海域逍遙境。榮途淡泊心。政成先養正。惠愛及民深。題劉太博棲心亭

宏構小侯第。避權長掩關。地分金穴貴。人共白雲閑。野色春牆外。池香暮雨間。燕申忘萬慮。吏隱敵箕山。留題龍光禪刹呈周長老

尋幽逢勝地。方外趣無垠。雙澗流寒月。千峯積暮雲。路盤塵境斷。世系祖燈分。卻愧留題處。猶須說見聞。留題澄虛亭

湖光湛寒碧。簾影拂莓苔。魚戲應同樂。鷗閑亦自來。雨餘輕鷖合。竹外雜花開。久欲留詩去。慚無綺靡才。送李廷評知福清縣

世閱茂儒紳。閩甌寵命新。縣圖遙盡海。鄉樹密藏春。祖帳鷺將老。登車雉已馴。行聞趨召節。舊美政如神。子規

一叫一春殘。聲聲萬古冤。疎煙明月樹。微雨落花村。易墮將乾淚。能傷欲斷魂。名韁慚自束。爲爾憶家園。

桂園早行

聞雞已行邁。策馬更徘徊。月色依山盡。秋聲帶雨來。自堪悲玉璞。誰復築金臺。薄宦空羈束。西齋長綠苔。

山館

野館蕭條晚。憑軒對竹扉。樹藏秋色老。禽帶夕陽歸。遠岫穿雲翠。畚田得雨肥。淵明誰送酒。殘菊遶牆飛。

晚至松門僧舍懷寄朱太祝

日暮倦行役。解鞍初息肩。霧昏臨水寺。風勁欲霜天。蓼浦初聞鴈。人家半在船。思君正招悵。黃葉更翩翩。

遊水南寺

雙刹聳浮雲。層軒絕世塵。松溪千蓋雨。茶圃一旗春。夜梵龕燈暗。朝香篆火新。暫來猶永日。堪羨白蓮人。

暮春

草帶全鋪翠。花房半墜紅。農家榆莢雨。江國鯉魚風。堤柳綿爭撲。山櫻火共烘。長安少年客。不信有衰翁。

宿山觀

孤枕秋宵永。山寒夢不成。殘燈背窗影。急雨帶溪聲。未分山中老。空思日下名。區區如逆旅。此際若爲情。

送岳師歸贛川

千里起歸思。愴然物外身。海山經處霧。梅嶺到時春。藥更開新楮。庭應長舊筠。年衰重方術。聊此送行人。

山寺獨宿

柴車走縣封窮途。秋耿耿。急雨失溪聲。殘燈淡窗影。驅馳下士身。淒涼旅人景。山寒夢難成。始識今夜永。

送任祕丞知長興縣

懿文通識氣飄飄。二十年來困下僚。吾道本將忠許國。世途休嘆老登朝。囊裝冷落堆青簡。衙署幽深枕畫橋。預想吳人蒙美化。海鷗桑雉共逍遙。

又和寄提刑太保

常記臨歧把酒盃。芳心應得見歸來。不從去日丁寧約。已向東風取次開。清燕固難停燭待。鵬鞍須是著鞭催。欄邊殘豔猶堪賞。莫使韶光過了回。

和伯恭自造新茶

郡庭無事卽仙家。野圃栽成紫筍茶。疎雨半晴回暖氣。輕雷初過得新芽。烘褫精謹松齋靜。採擷縈迂澗路斜。江水對煎萍髮鬢。越甌新試雪交加。一槍試焙春尤早。三盞搜腸句更嘉。多謝彩箋貽雅贖。想資詩筆思無涯。

送張如京知安肅軍

賜戟銜恩出斗城。塞門迢遞草初青。新提司馬臨戎節。舊應衣烏近極星。叔子戍吳長緩帶。單于歸漢已

空庭圮橋自得家傳策。不問人間太白經。

送劉學士知衡州

朱幡新命漢諸侯。地扼荆湘占上游。醴淥水聲侵古堞。祝融峯色入晴樓。晝垂三組鄉榜過。春擁雙旌嶽寺游。番直星垣歸緩步。謫仙通籍著瀛州。

送蓋太博通判定州都部署奏請

墨詔殷勤擢俊賢。精求毗佐四方翰。封疆謹守盧奴塞。旌旆仍親上將壇。衰草帶霜秋馬健。黃雲遮日暮城寒。燕南趙北邊之要。旅拒憑君一策安。

竊聞集賢侍郎政成公暇。時出游覽。因念青社境物之勝。長句四韻奉寄觀文殿大學士戶部侍郎定州路安撫使兼知定州龐籍上。

政報公餘稱雅懷。兩城煙樹盡樓臺。波通龍口春戲盛。今州廣固通五龍口。雲入山門曉望開。劈頭山一名大雲門。園館有詩書命筆。海邦無寇破蠻才。當時不俟交符印。恨失嵐亭展讌壘。

到塞後有懷青社詩今錄呈

初到營陵春始回。泱泱風物接梧臺。魚鹽利重通闌盛。竽瑟聲和讌席開。天際膚雲連岱色。海中靈藥慕仙才。早知未許身閑去。悔捨堯山石澗來。並青州遊賞最勝處。

觀文相公以靖忝承善政特寄嘉篇謹依嚴韻和酬

幸奉前規盡所懷。閑身吏隱裕春臺。山迴翠幌憑欄見。花蔕紅房遶郭開。青州紅牡丹。洛下有愛樹細名。南城花園。尤盛。民思美化。續貂孤跡愧非才。南河舊事依然在。禊飲杯盤耻畫壘。

和董職方見示初到番禺詩

五方殊俗古難并。千載猶存故越城。今子城。及東有故壘。俗號趙佗城。客聽潮鷄迷早夜。三更潮上。即雞鳴。人瞻颶母識陰晴。颶風欲至。西黑雲起。謂之颶母。波濤洶湧天邊闊。犀象爛熳徼外生。太守不才當遠寄。惟憂南畝廢農耕。

遊應聖宮

驅羸遠遠出嚴闔。雲構祠宮絕世塵。伴鶴不知龜甲子。斲山多見藥君臣。雨昏仙穴丹砂井。雲映樓居玉洞人。只待策勳書竹帛。抽簪來此卜比鄰。

西山

萬壑千巖鬪物華。椿筇閑訪道生涯。一壇星斗脩真館。數里雲煙斲藥家。魚戲竹溪寒影碎。路穿松塢翠陰斜。桃源自有神仙宅。未信明河八月槎。

賀孫抗員外春晝端居

萬事皆從適意休。何須快馬騁長楸。高人鼓吹鳴哇地。當世神仙笑臂樓。燕到捲簾如舊分。花開逢雨最

閑愁。僧來便學嘗茶訣。白乳槍旗帶露收。

謝孫抗員外惠酒

白衣遠遠到江樓。報道攜壺助勝遊。醉眼便堪終日富。離腸先破一春愁。梅梢背嶺開猶晚。雪片當風舞未休。此景滿腸方得意。不須千釀敵封侯。

馬當呼鷗不至偶成呈同行諸官

昔年曾泛馬當灣。團飯喚鷗篙楫間。今日江頭飛不下。應知人世足機關。

再簡伯恭

十載京華九日期。帝家園苑醉金卮。今朝郭外尋僧話。坐聽寒泉遶竹籬。

端午日寄酒庶回都官

龍舟爭快楚江濱。弔屈誰知特愴神。家釀寄君須酩酊。古今嫌見獨醒人。

五色雀

羅浮有五色雀。各被方色。非時不見。若士大夫將遊是山。則先入羣翔。寺僧以是爲候。某庚辰歲謫官來遊。將至之夕。茲雀亦集。感之成詠云。

五方純色儼衣冠。尤可愛者。朱藍正色。若朝服焉。應是山靈寄羽翰。多謝相逢殊俗眼。謫官猶作貴人看。

曲江津亭謁華嚴長老見所賜御書因成二韻

數年不侍玉爐傍。夢斷千山隔帝鄉。今日見師堪下淚。御書開卷帶天香。

重遊英州碧落洞

幽景前賢恨到難。泉聲清淺出巖間。區區宦路重來此。往歲征蠻。廣州罷任。塵世難逢特地閑。

